

1 REYES

Jawen unanmati janchaki

Na una miyui kenekinan, David xanen ibukin jatu yunukubaini mawaimaken januxun jawen bake Salomón xanen ibuaitian jatun pepawakubaini inun jatun chakabuwakubaini inun xanen ibu betsa betsapabukidi kenenibuki. Salomón xanen ibujaida kushipa inun unanepakin jawen jiweawen Dios duawakin uinmakin inun eskadabes kanekin chakabuwakin Dios uinmanikiaki. Salomón mawaimaken Israelin enabu xukua 10bu nortekidia paxkakin jatun betsa Judán enabu inun Benjamín enabun Salomónen bake Roboam jatun xanen ibu iniki. Jaskai jiwei itimaskakin pepa inun chakabu jusikin jatun xanen ibun chakabuwanibuki, jaska jabun Diosun jancha yuixunikabu keskakin jatu yusinkinan.

Kenenikabun miyui kenekubidankin chipu ja año 550 Cristo judiamatian tsuan jatun miyui ichawatan 1 inun 2 Reyes una bestichai wanibuki.

David anibujaidai eskanikiaki, na janchadan

1 ¹Xanen ibu David anibui mestebujaidaya tadi ichapa sawemakin dakukuti ichapawen yabujaidabiabu jawa xanamajaidaken ²jaskawen taexun jawen medabewanikabun shinanbaun yuikin: “Chipash beneumatun medabewakin mia mekei mibe uxakin jau mia xanawakubainxanun min xanen ibu bexmasbun jau mia chipash benaxunbauntanunbun jatu yunuwe”, akabu

³jaska shinainbu keska Davidin jatu yunua Israelin enabun mai pakea jidabi anu chipash jawendua benakubaunkin atimas mae betsa jawen kena Sunem anu chipash betsa jawen kena Abisag bechitan xanen ibujaida David anu iwexunimabu ⁴Abisag jawenduajaidatun xanen ibujaida David medabewai jabe uxabiakunkainaya Davidin jawa mekin chutamajaida ikunkainikiaki.

Jawen epan xantukun Adonías ibubis xanen ibunun ika ken nikiaki, na janchadan

⁵Jabiatiandi Davidin ain Haguutin jawen juni bake Adonías, iyuamabia jawen epan xantukun ea xanen ibujaidanun ika ibubis benikauan jatu

yuikin: “Eadan, Israelin enabun xanen ibujaida en matu ixunxanii”, ikunkainkin detenamenikabu caballon tadanbainti betsa betsapa jawen ibuana katukin ichawakubainkin detenamenikabu caballo katsaumemisbu katukin jabun meketi wakin 50 junibu jawena wakin katutan jiwekunkainkin ⁶jaska Adoníasin akai David yuibiabu jawen bake Adonías nemakubainsma inun ja jaskaitian: “¿Min jaskanun ika ikai?” iwanan, bebunkidi unankin yukaisma inikiaki. Janua Absalón ja dukun kaini jawendua iniken ja kachu Adonías kaindiani jabiaskadi jawendua idianikiaki. ⁷Jau Adonías jatun xanen ibujaidanun, iwanan, Seruíán bake Joab inun jawenabu Diosbe janchaxunika Abiatarbe yubakaimawen taexun ja dabetun Adonías medabewakubainaibun ⁸jakia jawenabu Diosbe janchaxunika Sadoc inun Joiadán juni bake Benafás inun, Diosun jancha yuixunika Natán inun Davidin jaibujaida medabewanika Simí inun, detenamenikabun David medabewamisbun jabu kushipabun Adonías bechipaikatsi ikabumaken

⁹xaba betsatian: “En jatun xanen ibujaida ixanii”, ikin jatu unanti wamanun, iwanan, besi itamama wakatsi jawen tsumabu yunua Roguelin unpax chacha dapi Zohélet mai pakea kexa unanti mishki ewapa anuxun chaxuwan inun ina awa inun ina awa bene yume bena jawen jubu mextemisbu xuajaidabu tesen keyuxun dashpe keyuxun jawen nami bawakin keyudiabuma Adoníasin betsabu Davidin juni bake betsabu besti inun Judán enabun xanen ibujaida David dayaxunmisbu jatubetan pi benimakatsi Adoníasin jatu kena bea ichabun ¹⁰jakia jati jatu kenamadan, Diosun jancha yuixunika Natán inun Davidin mekemisbu xanen ibu Benafás inun, David detenamenikabun medabewamisbu inun, jawen betsa Salomón Adoníasin jabube iama iken

¹¹jaskaibu Natánen ninkatan Salomónen ewa Betsabé anu kaxun jabe janchakin yuikin:

—David nukun xanen ibujaida ma tsuan banabimawana ikimenkain. Ja jawen ain betsa Haguitin bake Adonías: “En matun xanen ibujaida benaki”, ikin yuikin jatu pimai benimaidan, ¿min ma ninkamen? ¹²Mia inun min bake Salomón man mawayamaxanun unanepa jancha en mia tapinmai ea ninkawe. ¹³Xanen ibu David anu kaxun eska yuitanwen: “En xanen ibuun, en bake Salomónen Israelin enabu yunui jau jatun xanen ibujaidaxunkunkainxanun min ebe yubakabaimaken ¿jaskai Adonías xanen ibui taeimenkain?” akin na jabis jancha min yuiaya ¹⁴eadi jikitan jaska min yuiai keskadi eandi jabisdi David en mia yuixuni kaii— aka

¹⁵jawen jancha ninkatan janu David uxamis dintu anu Betsabé kai jikia xanen ibujaida David anibujaida Sunem anua chipash Abisag medabewaya ¹⁶Betsabé danti iki beti ika dakaken xanen ibujaida Davidin yukakin:

—¿Min jawa ea yuikatsis ikai?— aka

¹⁷kemakin yuikin:

—En xanen ibuun, ¿mia yuipa? Mia kachu min bake Salomón Israelin enabu xanen ibui min xanen ibui tsaumis anu tsauxun jau jatu yunukubainxanun min mekenika Dios Jehován kenawen min ma ebe yubakabaimaken ¹⁸mia jawa banabimamabia: “En matun xanen ibujaida benaki”, ikin Adoníasin jatu yuikiaki, ikisdan. ¹⁹Ina awa inun ina awa jubuuma xuajaidabu inun chaxuwan ichapa tesenxun dashpexun jawen nami ma pewabu jau jabetan pinunbun min juni bake betsabu inun Diosbe nukunabu janchaxunika Abiatar inun detenamenikabu xanen ibu Joab Adoníasin jatu kenaxun ma jatu pimaikiaki. Jakia min medabewanika min bake Salomón kenamaki. ²⁰Mia kachu tsuada Israelin enabu xanen ibujaida ikunkainxanai min katuxanai unankatsi dasibitun manakanikiki. ²¹Min jawa katuama Adonías xanen ibukunkainkin min mawaken min bake Salomón inun ea tenantiduki— iki

²²jabe janchai jenediamaken jawen dintu jikiti xui anu Diosun jancha yuixunikadi Natán ma jua jikikatsi ikaya ²³David mekemisbun yuiabu jau jikinun Davidin jatu yunua januxun bichiabu Betsabé kainkidanaya Natán jikia danti iki beti ixun ²⁴David yukakin:

—¿Mia kachu Adonías xanen ibujaidakunkainxanai min ma yunuamen? ²⁵Na jabiatian ina awa inun ina awa jubu mextemisbu xua inun chaxuwan ichapa tesenxun dashpexun ma bawabu min juni bake betsabu inun min detenamenikabu xanen ibubu inun nukunabu Diosbe janchaxunika Abiatar Adoníasin jatu kena butubain jabetan pikin mabex nexui benimakin jui kushipawen yuikin: “Nukun xanen ibujaida Adonías jau jiwekunkainunwen”, ikaibun ²⁶jakia ea inun, nukunabu Diosbe janchaxunika Sadoc inun, mia mekemisbu xanen ibu Benaías Joiadán bake inun, min bake Salomón Adoníasin nuku jabu pimakatsi kenamaki. ²⁷¿Min xanen ibunan, min ma jatu yunuamen? En min dayadu ea yuiama ¿jaskakin jadata min bake mia kachu xanen ibuxanai min ea banabimamamen?— aka

Jau Salomón xanen ibujaidaxanun Davidin xabakabi jatu yununikiaki, na janchadan

²⁸jawen ain Betsabé ana jau kenanunbun Davidin jatu yunua ma iweaibun Natán kainkainaya Betsabé ana jikia xanen ibujaida David bebun nia ²⁹Davidin jancha wakin yuikin:

—Ea chakabuwakubainkin ea datepayabu ea jatu bextexunmis Jehován ea ninkaya xabakabi en mia yuiaii. ³⁰Ea kachu min bake Salomón en janu xanen ibui tsaumis anu tsauxun Israelin enabu dasibi yunui xanen ibujaidakunkainxanai ikis nukun bake Salomón en mia katuxunaii. Israelin enabu mekenika Dios Jehován ea ninkaya en mibe yubakaii— akaya

³¹xanen ibujaida David bebun nia ana jaki danti iki beti ixun jui kushipawen yuikin:

—¡En xanen ibujaida David jau jiwepakenunwen!— ikaya

³²Januxun nukunabu Diosbe janchaxunika Sadoc inun Diosun jancha yuixunika Natán inun Joiadán bake Benafás jau benunbun Davidin jatu yunua jatu yuiabu ja dabe inun besti xanen ibu bebun ma bea mapuabun ³³jatu yuikin:

—Ea dayaxunmisbu en xanen ibububetan en bake Salomón iyukin en mula ea besti en jaki katsaumekeinmis katsauntan ja paxku deti ika jawen kena Guihón anu en mulaki katsaunbainkin iyutankanwen. ³⁴Jadixun Israelin enabu xanen ibujaida jau jatu ixunxanun jatu unanti wamakin min nukunabu Diosbe janchaxunika Sadoc inun min Diosun jancha yuixunika Natánen jadixun xeni ininipawen maukatankanwen. Jaska watan chaxuwan maxun jatu chan chan amakin: “Xanen ibujaida Salomón jau jiwekunkainxanunwen”, akin dasibibun jui kushipawen jatu yuimakubidantankanwen. ³⁵Januxun Israelin enabu inun Judán enabu yunui jau xanen ibujaidakunkainxanun en ma katuawen taea iwekin en xanen ibui janu tsaumis anu tsaua en xantukun ja xanen ibujaidai ikunkainxanai en jiwe jawendua ewapa anu jabe betankanwen— jatu wa ³⁶Joiadán bake Benafásin kemakin yuikin:

—¡Jabiaskaki! ¡En xanen ibujaida Davidin mekenika Dios Jehován jau jabiaskadi yunukubainunwen! ³⁷Jaska mia medabewakubidanmis jabiaskadi wakin Jehován jau Salomón medabewakubainunwen, xanen ibu kushipajaida wakin min imis mia binumakinan— ikaya

³⁸Janua jawenabu Diosbe janchaxunika Sadoc inun Diosun jancha yuixunika Natán inun Joiadán bake Benafás detenamenikabu Querete nawabu inun Pelete nawabun David mekemisbube buxun Davidin mula Salomón katsauntan paxku debu deti ika Guihón anu iyuxun ³⁹Dioski nukuti tadi jiwe puntenibu anuxun xeni ininti maxunkia bitan Israelin enabu xanen ibujaida jatu unanti wamakin Diosbe nukunabu janchaxunika Sadocin Salomón xeni ininipa maukatan chaxuwan maxun jatu chan chan amakin dasibi ja jatube buabun jui kushipawen yuikin: “¡Xanen ibujaida Salomón jau jiwekunkainxanunwen!” akubainkin ⁴⁰jadia dasibibu benima chakayamabidankin tepedewe mawakubainkin Salomón mula katsaumekeinai dasibibun chibain sai sai iki shanshanki ichakayamakubainaiibun mai beshakunkainaya

⁴¹Adonías inun ja jatubetan pikin meneaiibun Jerusalén anu bei sai sai iki shanshanki ikubidanaibu jabun ana ninkaya chaxuwan maxun chan chan akubidanaibu Joabin jatubetan ninkai yuka iki:

—¿Jawamen? ¿Jaskai janchawanchakayamakanimenkain, Jerusalén anuadan?— ikaya

⁴²Joab jancha jenediama nukunabu Diosbe janchaxunika Abiatarin bake Jonatán Jerusalén anua kai jikiai Adoníasin uintan yuikin:

—Jikiwe, min juni mentsisipa kushipawen taea kaka pepa min nuku bexuinmenkainan— aka

⁴³Jonatánen kemakin Adonías yuikin:

—Jaskamaki. Xanen ibujaida David yununikatun Salomón katukin Israelin enabu nukun xanen ibujaida waxuki. ⁴⁴Diosbe nukunabu janchaxunika Sadoc inun, Diosun jancha yuixunika Natán inun, Joiadán bake Benaías inun, David mekenikabu Querete nawabu inun, Pelete nawabun jau Salomón iyukin mekebainunbun xanen ibujaida Davidin jatu yunuxuki. Xanenibun jatu yunua jawen mulaki Salomón jaki katsauntan Guihón anu iyua ⁴⁵Israelin enabu xanen ibujaida jatu unanti wamakin Diosbe nukunabu janchaxunika Sadoc inun Diosun jancha yuixunika Natánen Salomón xeni ininipa maukai dasibibun uintan benima chakayamai chintunbidankanikiki, jaskawen taea Jerusalén anu jiweabu sai sai ichakayamakubidanaibu man ninkaidan. ⁴⁶Ja dikabi xanen ibujaidatun tsauti ibuwai Salomón ma inai jaki tsauxuki. ⁴⁷Jaska bestima Davidin dayadubu dasibi benimai buxun yuikin: “Diosun jau Salomón duawakubainxanunwen, xanen ibu kushipa wakin mia binumakinan”, akeakeaibun xanen ibujaida Davidin Dios kenwain jawen dakati anu beti ixun ⁴⁸jatu yuikin: “En bake kayabi xanen ibujaidai xanen ibujaidatun tsauti anu ma tsaua en beduwen en uianwen taexun Israelin enabu mekenika Dios Jehová benimawakin duawakin jau kenwankubainxanunbunwen”, akai ninkaxun ea yuikaxuki— akin Jonatánen Adonías yuia

⁴⁹Adonías xanen ibujaidanun, iwanan, jatu ichawatan pimai jabun ninkatan jaki datei saki saki iki taei benitan bestibu tibi paxaibun ⁵⁰jatu jaska waiwen taea: “Salomónen ea detetiduki”, ika datei Adonías jadi benikaini Dioski nukuti tadi jiwe puntenibu anu ka jau Salomónen ea kupikin tenanyamanun ika jawen kenwanti chi tapu maxun keska jawen ishchankan tsuma dakaken ⁵¹uinbain tsuada kaxun Salomón yuikin:

—Min xanen ibujaidaiwen taea miki Adonías datei jau min deteyamanun Dioski nukuti tadi jiwe anuxun jawen kenwanti chi tapu maxun keska Adoníasin tsuma dakaxun yuikin: “Jau ea tenanyamanun, ixun xanen ibujaida Salomón ebe yubakatidu en ea akaii”, itan jaska jawen jancha ea bemaxuki— aka

⁵²Salomónen ninkatan yuikin:

—Peki. Juni pepa keska ikunkainaya jawa chakabuma ixanikiki. Jawen yudakidi en jawa meamajaida ixanaii. Jakia jawada chakabu jakidi en bechiadan, mawaxanikiki— itan

⁵³Dios kenwanti chi tapu anua jau iwenunbun Salomónen jatu yunua kaxun Adonías iweabu jau jawen nuinun xanen ibujaida Salomón bebun Adonías di iki beutan beti ika daka Salomónen yunukin: “Jawa chakabuwama min jiwekunkainkatsis ikaidan, min jiwe anu unanuma kadiwe”, aka jawa yuiama benimai kainkainken

**Jawen jenekin Davidin jawen bake jancha
wakin yununikiaki, na janchadan**

2 ¹David ma mawa kemaxun unankin jawen bake Salomón Davidin yunukin: ²“Ma en mawa kemaii. Yuda dasibibu imisbu keskai nukun xenipabuki en nukui kaxanaii. ³Eamaki mentsisipai juni kushipakunkainxanwen. Janida min kai inun jawada min akubainai jau Jehován mia medabewakubainxanun jaska Moisin keneni jawen yunuti inun jawen nemati inun dasibi jaska bechipaii unankin jaska min mekenika Dios Jehován mia yunuai keska besti akubainxanwen. ⁴Jhován bebunkidi ea yubaniwen taea man en bakebun matun shinan jidabiwen inun matun yushin jidabiwen man enabu pakubainkin jawa chakabuwama chanima ibubis mekei pe jiwekunkaini man enabu Israelin enabu xanen ibujaidai ikubainxankanaii, jawa jeneama ipakeidan, man Jehován jancha chibankubainaibudan.

⁵Betsadan, eska wakin en kui Seruíán bake Joabin ea dake wani min unaiin. En detenamenikabu xanen ibu dabe Nerin bake Abner inun Jéterin bake Amasá janu unanuma jiweabun jatu padantan ja dabe Joabin chachi dabekin jatu tenaniki, detenamekin jawenabu tenainbuwen taexun Joabin jatu kupikinan. Jaska wakin jatu padankin xabakabi chachixun Israelin enabu dasibi Joabin ekidi jatu chakabu shinanmaniki. ⁶Joabin jatu tenani chakabuken ean en jawa wamajaidawen taexun jau unanuma Joab mawayamaxanun unanepakain jau jatundi bika tenenun bika tenemakin Joab tenanxanwen, ea kupixunkinan. ⁷Jamen betsadan, yuda betsabu jabun ea duawanibu ea jabudi pepa waxunkubainxanwen. Min betsa Absalón anua en paxaima Galaad mai pakea anuxun Barzilai ewen nuikin jawada nun jayama nuku inankin ea mekekubainimawen taexun Barzilain enabu duawakubainxanwen. Jerusalén anu jawen juni bakebu bai beaibu jatu itan min tapu anuxun jatubetan pikubainxanwen. ⁸Janua juni betsan ea jaska wani uinwen. Benjamín enabu betsa Bahurim anu jiweni jawen kena Gueránen juni bake Simí nenu Jerusalén anu mibe jiweaki. Absalón xanen ibuatian paxai Mahanaim anu en kaya ea chakabujaidawakin ea yupukubainyamaki. Absalón enabu, enabun jatu maemaimaken nun ana chintunkidanaya Jene Jordán anu eki nukukin ea ikaxun ea daewakin en Simí tenanyamanun ea yuka Jehován ea ninkaya en jabe yubakayamaki. ⁹Jabiaskabiaken Simín ea chakabuwayamadan, miadan, jakimayamaxanwen. Miadan, min unanepaki. Jaska min wakatsis ikai kupixanwen. Jau unanuma mawayamaxanun Simí bika tenemakin jatu tenanmaxanwen”, aka

David mawanikiaki, na janchadan
(1 Cr 29.26-30)

¹⁰David jatun xenipabu anu ichai kai unanuma mawa Jerusalén anu janu ja dukun mishkiwen jatu kenemabaunibu anu jawen kena

benawanakin: “Davidin Maeki”, anibu anu jawen yuda maiwanibukiaki. ¹¹Xanen ibujaidai taei Hebrón anu 7 año itan janua maei Jerusalén anu 33 año ikunkaini jabiati dasia 40 año Israelin enabu David jatun xanen ibujaidaxunkunkainikiaki. ¹²Chipu David mawadiama jawen epan xantukun Salomón xanen ibui taekaini kushipakunkaini xanen ibuai tsuan mebintiduma pepa inikiaki.

**Egipto xanen ibu Faraónen ainbu bake
Salomónen binikiaki, na janchadan**

3 ¹Ana jabe detenametima wakin Egipto xanen ibu Faraón ena wai Salomón jabe yubakatan janubi jawen ainbu bake ainwantan Davidin mae mishki kenebaunibu anu iyui jikima janu jiweyuxun jatu yunukubainaya Salomónen jiwe ewapa jawenduajaida wakin keyuxundiabuma inun, Jehováki nukuti mishki jiwe wakin keyuxundiabumadi inun, Jerusalén mananan mishki kenebaunkin ma mene kemaibun ²Jehová kenwanti jiwe keyudiabumawen taexun jabun Dios ikonwanbuman amisbu keska wakin jatun beya chibankin mati keyatapa betsa betsapa anuxun Jehová kenwankin chaxuwan tesexun dashpekin keyutan jawen xeni bixun xeni ininipayabi chiwen menukin keyukin jawen namidi bawaxun Jehová kenwankin pikubainaibun

**Jawen unanepati Salomónen Dios yukanikiaki, na janchadan
(2 Cr 1.1-13)**

³Salomónen Jehová bechipaikin benimawakin jaska jawen epan Diosun yunuti Davidin kenekubaini ninkakin chibankubainkin jakia jawenabun akai keska wakin mananan kaxun Jehová kenwankin inabu nami inun jawen xeni inintiyabi chiwen menukin Salomónen jatubetan adiakubaini ⁴mae Gabaón anu mati keyatapa anuxun januxuns yudan kaian ichapajaidatun bechipaikin Jehová kenwain bumisbu anu inabu nami inun xeni ininti Jehová kuaxunun ika Salomón jabanudi kadiaxun 1,000 chaxuwan jatu tesenmakubainkin chiwen chaxuwan bushinxun bestibu tibi jatu menu keyumakubainkin Salomónen Jehová benimawakubaina

⁵mae Gabaón anu meshu medan Salomón uxa daka namaya Jehová juxun Salomón yuikin: “Jawada min ea yukakatsis ikai ea yukawe, en mia inanaxanidan”, aka

⁶Salomónen kemakin yuikin: “Min dayadu David en epadan, min katukin taewatan duawakin min mekekubainiki. Jiwekunkainkin mia bebunxun mikidi pe shinankin pepa wakubainkin mia chibain chintuinsmawen taexun bechipaajaidakin ea jawen juni bake Israelin enabu xanen ibujaidawakin katuxun min eadi yunuimaki. ⁷En

mekenika Dios Jehováan, en bedunan en shinan jayadimabiaken mian en epa Davidin xantukun min ea tsauinmaki, Israelin enabu en yunukubainxanunan. ⁸Yudan kaian minabu wakin min jatu katuni midimajaida tsuan jati shinankin tana keyutiduma anu en jatu xanen ibuxuni en jatu bebuxunaii. ⁹Minabu mekekin en jatu yunukubainxanun jawen jatu pe yunukubainti kushipa ea inanwen, pepa inun chakabu unanti shadawakinan. Min ea jaska wamaken ja yudan kaian midima tsuan jatu pe mekekin yunutidumaki”,

¹⁰Salomónen jaska yuka Jehová benimakin ¹¹yuikin: “Jiwea chaipa min ea yukama inun, mabu inun pei ichapa min ea yukama inun, miki sinataibu jau mawaxanunbun min ea yukama jakia unankin ninkakin en pe xanen ibukin yunukubainxanun ixun shinankin xabakabi min ea yukaxuwen taexun ¹²jaska min ea yukai en mia axunkubainxanaii. Jawen unanepati inun shinan xabakabiti min buxka medan en mia unanmakubainxanaii. Min idiamaken tsua jaska jayama inibu inun unudi tsuan mia binunbaun chipu jaska jayama inunbadikanikiki.

¹³Ja inun, jaska min ea yukama ibiaxu mabu inun pei midima inun jawada jawendujaida jaska uinsbuna en mia inandiakubainxanaii. Min jiweyukunkainaya xanen ibujaida betsa mia keska jayama ixanikiki.

¹⁴Jaska shinankin en bechipaiai akubainkin en yunuti inun en nemati min chibankubainaya jaska min epa Davidin chibani keska min ikaya badi ichapa en mia jiwemayukubainxanaii”, aka

¹⁵ninkatan teku ikidan bestenxun: “En namaiwen Jehován ea jancha waxuki”, ikin shinankubidani Jerusalén anu chintunkidani jikitan Jehová jawen xenipabube yubakani jancha aduni bau bebun nixun chaxuwan bestichai tesenxun chi tapu anuxun chaxuwan jidabi menukin jawen kuin manaundi puebainai Jehován xetei benimaya Salomónen jaska waxunkin keyutan chaxuwan midima tesenxun dashpexun jawen xeni besti bikin keyuxun xeni inintiyabi jau menukin keyuxununbun Salomónen jatu yunua akubainkin keyuxunaibun ja chaxuwan nami ichapa jau bawakin keyununbun Salomónen jatu ana yunua bawakin keyuaibun Jehová daewakin kenwankin jawen mekenikabu dasibibu jatu benimawakin pimakin Salomónen jatubetan pinikiaki.

Salomón unanepakin xabakabi jatu uinmanikiaki, na janchadan

¹⁶Jaskaitian ainbu jininipa dabe xanen ibujaida Salomónen jau jatu medabewanun ixun uinun ika buabu jau jikinunbun Salomónen jawen mekenika yunua jatu bichiabu Salomón bebun ja dabe nixun ¹⁷betsan dukun yuikin:

—En xanen ibuun, ¡nuku uinwen! Na en jaibu inun eadan, jabias jiwe anu nun ikaki. Jabias jiwe anu nun jiwea ea dukun juni bake en kainshinaki. ¹⁸Xaba dabe inun besti kaya na en jaibudi juni bake

kaindiashinaki. Nuku dabe jabias jiwe anu nun jiweken tsua betsa jayamaken nuku daves nun jiweshinaki. ¹⁹Jakia meshu betsatian jawen juni bake mamaki na ainbu dakaxun bakeishta tenantan ²⁰yamenapun jawen bake tenan unantan en uxa anu benikaini kaxun ea dapikea en bake june bixun, jawen bake mawa buxun ea janaxuntan en bake jiwea bibidan jubunken ²¹penama bestenkauan en bake chuchu amanun, iwanan, benikauan ma en bake mawa en bechibia januxun ma penai xabajaidaken uinjaidakin ja bake en kainshina jama en bechishinaki— ikaya

²²juni bake ikuxun ja ainbu betsan jawaida yuikin:

—Jaskamaki. Min bakedan, mawashinaki. Na enadan, jiweaki— ikaya jakia ja dukun chanixutun kemakin yuikin:

—Jaskamaki. Min bakedan, chanima mawashinaki. Ja ena min ea maenwankin bianshinadan, jiweaki— iki

xanen ibu bebunua ainbu dabe chitenamedabeaibun, ²³jaskaibu ninkatan xanen ibujaida Salomónen shinankin:

—Natun yuikin: “En bake jiweaki inun betsa ma mawashinaki”, ikanikiki. Jakia betsan yuikin: “Jaskamaki”, idabekanikiki. ¿Ja jaskadabeaibudan, jadata chanima kayabimen?— itan ²⁴jawen tsumabu yunukin:

—Machatu chaipa kenujaida ea bexunkanwen— jatu wa machatu bitanxun xanen ibu inanbu ²⁵xanenibun jatu yunukin:

—Ja bake jiwea namakis mextetan ja ainbu dabe jatu inankanwen— jatu wa

²⁶jakia nemakin jawen bake jiweawen nuijaidakin jawen ewa kayabitun xanen ibu yuikin:

—En xanen ibuun, jaskamaki. Ea ninkawe. Na bakeishta tenanma ainbu betsa inanwen— aka

jakia ainbu betsan yuikin:

—Enama inun minamaki, nun ikaidan, jau tuax anunbunwen— ikaya

²⁷xanenibun jatu nemakin kemakin:

—Bakeishta jau mawayamanun ja ainbun benukatsis ikamadan, chanima jawen ewa kayabiki. Ja bakeishta tenanma ja inankanwen— jatu wa ma bakeishta inanbu

²⁸ja ainbu dabe ja idabeaibu jatun chakabu unanti watan Salomónen jatu pewashina Israelin enabun ninkaibun, jau Salomón unanepakin pe jatu yunukubainxanun Diosun jaska inainma jatu pewakin unankubainai dasibi Israelbun unain jawen datekin jawa chakabu jakidi yuiama ikubainibukiaki.

Salomón Tiro xanen ibujaida Hirambe yubakanikiaki, na janchadan
(2 Cr 2.1-18)

5 ¹Jawen epa Davidin xantukun Israelin enabu jau jatun xanen ibujaida ikunkainxanun Salomón ma katuimabu Tiro xanen ibujaida

Hiramnen tapintan jawen epa David jaibuwai bechipaikubainiwen taexun Salomón jaibuwakatsis ikin Salomónbe jau janchaxuntanunbun, iwanan, Hiramnen jawen janchaxunikabu jatu yunua ² buxun jau jawen jancha yuixuntanunbun eska Salomónen jatu yuikin: ³ “En epaki sinataibu Jehován jatu maemamadiama nemai en epa jatube detenamekunkainmiswen taexun jawen mekenika Dios Jehová januxun kenwanti jiwe en epan axuntiduma ikunkainima min unaiin. ⁴ Jakia en mekenika Dios Jehován ma nuku unanuma jiwemakubainaya nukuki sinataibu inun jamapai chakabu nun ana jayamaki. ⁵ Jehován en epa yuikin: ‘Min xantukun jau Israelin enabu yunui xanen ibujaidakunkainxanun min bake katukin en kushipa waiwen taexun jatun en kenwanti jiwe ea axunxanikiki’, akin en epa yubaniwen taexun en mekenika Dios Jehová januxun kenwanti jiwe templo jawendua en axunkatsis ikaii. ⁶ Jaskawen taexun mai pakea Líbano mati matipa anuxun jau kuxa ea mextexununbun jatu ea yunuxunwen. En dayadubun matun dayadubu jatu medabewaxankanikiki. Jaska Sidón nawabun ji senkea unanjaidakin pewamisbu enabu betsan jabiaskadi watidubumadan, min unanjaidaiwen taexun min dayadubun ea dayaxunaibun jawada min ea yukai en mia pakaxanaii”, aka Salomónen jancha buxun

⁷ jatun xanen ibu Hiram yuiabu Salomónen jancha ninkatan shinan chankain benimakin yuikin: “Jawenabu midimabu jau yunukubainxanun Jehován Davidin juni bake unanepa ma inanwen taexun Jehová kenwanankanwen”, itan

⁸ jau jawen janchadi buxuntanxanunbun Salomón kenexunkin: “Min jancha min ea bemashina bixun en uinxuki. Peki. Ja ji kuxa inun ji ciprés jau mia senkexunkubainxanunbun en jatu mia yunuxunaii. ⁹ Líbano mati matipa anuxun ji bestibu tibi dedatan jawen mebi mextekin keyukubainaibu xukua betsabun jawen ji jidabi chaipa xadabainkin machi butemabainkin ianenwan kexa manchintan janua ana chintunkain ji ichapa xadabidanbidankin ianenwan kexa janus manchinbidanbidankin jawa jeneama uxe ichapa jabias dayakubainaibun, xukua betsabun keku tibi watan ianenwan pasu bukin surkidi bukubainkin janu min ea yunuxanai anu keti atan ji keku pekatan jene anua nexebainbainkin maspu wakubainkin jeneama uxe ichapa jabias dayakubainaibun janua min dayadubun Jerusalén anu bukubainxankanikiki. Jati min bechipaiai min ea yunuaiti nun jenexanaii.

Jamen minadan, jaska en jiwe ewapa jawendua anu ebe dayaibu inun enabu en jiwe anu ebe jiweabu jau pikubainxanunbun jawada piti min jaya en mia yukai ea inankubainxanwen”, aka jawen jancha kenexunkin keyua Salomón anu jau butanunbun xanen ibu Hiramnen jatu yunua buxun Salomón inanbu

¹⁰Jawen jancha Salomónen bechipaikin jati ji Salomón jayakatsi ikin Hiram yukaima inankubainaya ¹¹Hiramnen jiwe ewapa jawendua anu jiweabun jau ja pikubainunbun año tibi 4,400,000 litro xekiwan trigo inun 4,400 litro olivo xeni pepa Salomónen Hiram inankubainaya ¹²jaska Jehová Salomón yubaimaxun jawen unanepa shinan xabakabi ma inainmawen taea jawen unanuma jiwekainkin Salomón Hirambe yubakanikiaki.

¹³Jabiatiandi juni kushipabu midima Líbano anu jau jabu dayaxunkubainxanunbun Israelin enabu mae tibi anua jawen xanen ibu bexmasbun jau jatu katukubauntanunbun Salomónen jatu yunua Israelin enabun mae tibi anu uinkubaunkin bestibu tibi katukubaunkin 30,000 dayadu tsuma wakin jatu ichawabun ¹⁴januxun xanen ibujaidatun jawen dayakapa xanen ibu Adoniram katutan Líbano anu yununikiaki. Januxun jabu dayatantxanaibu jatu paxkakin 10,000 junibu xukuabu dabe inun besti watan uxe bestichai nichin jau dayaxanunbun xukuabu tibi jawa jatu pakama piti besti inankin año tibi jatu yunukubainaya jatu jaska wakubaina jabu dukun xukuabu buabu Líbano nawabube ji dayai uxe bestichai dayai menetanaibun jatun jiwe anu bua jadi uxe dabe dayaibun janua ja kachu xukua betsadi bui jikia jabudi dayaibun jabu dukun xukuabu jatun jiwe anu beabun ana uxe bestichai dayai meneai bu ana ja kachu xukuabu bui jikia dayadiaibun ja kachu xukuabu jatun jiwe anu bea dayaibun ana uxe bestichai dayai meneai bu jabu dukun butanima ana dayai bui jikiabu ja xukua dabe inun besti jaska wakubainaibu jawenabus tsua nuitapabumaken ¹⁵Salomónen jawen mai pakea anua jawen dayadubu jatu dayamakubaini mati matipa anuxun 80,000 mishki ewapa pewaibu inun 70,000 ji chaipa inun mishki ewapa xadabainaibu inun ¹⁶3,300 xanen ibu bexmasbun jabun dayadubu yunukubainmisbu jati tana keyuama ¹⁷Dios kenwanti jiwe jemaintin anu jaki tsamabaunti jau axununbun mishki ewapa datsai daya kadujaidakin 6 dexun wakin jabiatiubus mishki midima jau bixuntanunbun xanen ibujaida Salomónen jatu yunua ¹⁸mae betsa Guebal Jerusalén dapi jiweabun januxun ji inun mishki pewakubainmisbu anu Salomón jabun ji inun mishki dayakin pewaxunikabu inun Hiramnen ji dayakin pewai unanepajaidabun jatun mae Guebal anua bei Jerusalén dapi jiwea 7 año Israelin enabube dayakin Jehová kenwanti jiwe jau axununbun jaska wati waima chibankin jawen mishki tibi tanakin pewakubainkin bitan bitankin inun bebidan bebidankin manchinxunibukiaki.

**Salomónen Jehová kenwanti jiwe templo jatu
amanikiaki, na janchadan
(2 Cr 3.1-14)**

6 ¹Jawen xenipabu Israelin enabu Egipto anua paxai taxnibidanibu 480 año binukainaya ma 4 año Salomón xanen ibukunkainkin

uxe ja kachu jawen kena Zivtian Jehová kenwanti jiwe wakin jau daya taebainunbun Salomónen jatu yunua ²jatixun kesua inun jatia masua jawen chaipadan, 27 metro inun jawen jaxpa 9 metro inun jawen keyatapadan, 13 metro medio akin keyuabu ³janu jikiti xui bebun jawen bepudu janu utati dexaba wakin Salomónen jatu yunua ana chichikin jaska wakin jawen chaipa 9 metro ja kenwanti jiwe jawen jaxpa jabatiubukuns wakin jawen dexaba 4 metro medio inun jawen keyatapa 8 metro wakin chipu mane chibu waxanaibu unantan ji chibu nichianbu ⁴jawen chaipa ispi dabe anu janu niwe jikiti xui mane nanichinkin jau jashu wanunbun Salomónen jatu yunua niwe jikiti xui anu mane nunkupabu betsa betsapa nakishkunabu ⁵jawen kenwanti jiwe ispi bukun ja dapi dintu dabe wakin aduti tapu ichapa wakin dabe inun besti tapa jau anunbun Salomón jatu yunudia ⁶jawen kenwanti jiwe mishki kene anu jaki nakishkun mistuti xui wakatsi ikama jawen kenwanti jiwe mishki kene anu jawen nakishkun janati watan ja dukun janu aduti tapu jawen naxaba 2 metro 25 centímetro inun jawen keyatapa anu jawen kenwanti jiwe kene 45 centímetro jashu watandi ja kachu manaundi aduti tapu jawen jaxpa naxaba 2 metro 70 centímetro ana ja kachu manaundi aduti tapu jawen jenea naxaba jaxpa 3 metro 15 centímetro jawen keyatapa anu jawen kenwanti jiwe kene ana 45 centímetro jashu watandi jaska wakin Jehová kenwanti jiwe templo kene anu xexakubainkin jawen aduti dintu tibi keyuabu ⁷Jehová kenwanti jiwe wakin mishki tibi ewapa inun jatiubuma betsa betsapa bebunkidi 6 sapa kedan tibi jatiubus kesua inun jatia masua wakin datsakin pejaidawaimabuwen taea mae betsa anua mishki bebidan bebidankin badi ichapa janus manchinkubainimabun jawen mastati inun due inun jawen mane dayati betsa betsapa ana jawa tsuan meamawen taea tsuan kusha kusha akama nishmajaida dayakin tsama bestiaibun ⁸Jehová kenwanti jiwe ispi yusiudi jawen aduti dintu ja dukun tapu jikiti xui beputiya wabu, jawen inakainti tapaiti shadabu wakeakeabu ja kachu tapa inun ana ja kachu tapa anu keyutan januxun dasibi tapaiti wabainkin chintuan akeakebainkin meneabu

⁹jawen kenwanti templo mishki kene ma keyuabu kuxa tuax ewapa 9 metro keyatapa bexa jawendua tsaminkin kekunbainkin keyuxun jawen ishkishkunki netanbainkin keyuabun ¹⁰jawen kenwanti jiwe dunkebauna jawen aduti jawen keyatapa 2 metro 25 centímetro kuxa nakishkun tibi jawen kenwanti jiwe kene anu xeti akin pejaida washinabu ¹¹Jehován Salomón yunukubainshinxun ana yuikin: ¹²“Na januxun ea kenwanti jiwe min ma menekubainaiwen taexun en mia yui ai ea ninkawe. Jaska min xenipabu en yununi jancha ninkakubaini pe jiwekainkin en yunuti jancha inun en nemati jancha min chibankubainaya jaska mikidi min epa David en yubani en mia axunkubainxanaii. ¹³Min jaskaya Israelin

enabube en jiwekunkainxanii. Enabu Israelin enabudan, en jatu putama ikunkainxanii”, aka

¹⁴Jehová kenwanti jiwe uke medan keyukatsis ikin Salomónen ana jatu yunua ¹⁵⁻¹⁶kuxa tuax sapa ichapawen uke medan mishki kene keyubiaken ana jamamaki kebenbaunkin manaundi inun naman tsaminbaunkin keyuxun mishki tapabiaken ji betsa ciprés nukun janchawen yuiadan, buni keskadan, jaska ja tuaxwen achimabaunkin keyuabu jawen xenipabube Jehová yubakani jancha aduni bau janu tsaunti ja pake betsa pechiudi naxaba 9 metro washianbu kenakin: “Dintu Medibijaidaki”, akin kenati watan ja dintu betsa pakekin tadi kextupawen kebenkin puntebainkin keyuabu ¹⁷ja Dintu Medibijaida bebun dintu naxaba betsa jawen chaipa 18 metro wanibukiaki. ¹⁸Jehová kenwanti mishki jiwebiaken uke medan uintima wakin kuxawen bebetan nupewen dami wakin ni jua inun ni bimi keska wakin jawen kene dau wakin jawendua wanibukiaki.

Jehová Salomónbe yubakanikiaki, na janchadan (2 Cr 7.11-22)

9 ¹Jaska wakubainkatsi ikin Jehová kenwanti jiwe inun jawen jemaintin anu jamapai shadabu jatu wamakin jabatiandi jawen jiwe ewapa jawendua jatu amadiakin Salomónen jatu menemaken ²Gabaón anua Jehová Salomónki nukuni keska ana ja kachu Salomónki nukutan ³ana jabe janchakin yuikin: “Min ebe janchakin ea kenwain inun min ea ea akai min jancha en ninkayamaki. Ja kenwanti jiwe min ma akima anu en kena ikunkainxanaiwen taexun medibi ena wakin en ma pepa washinaki. Mekekin uin en janu ikunkainxanii. ⁴Jakia eskatian jaska min epa Davidin chakabuwakatsi ikama pe jiwekunkaini keskai ea bebunua miadi pe jiwekunkainkin en jatu yusini chibankin inun en yunuti jancha inun en nemati jancha miandi ninkai xanen ibui min jawen jiwekunkainaya ⁵Israelbu minabun jatu yunui jau xanen ibukubainxanunbun bestichai katuxun en xanen ibujaida wakubainxanii. Min epa David ean yuikin: ‘Min ma mawaken jau min xantukun Israelbun jatun xanen ibuwakin jawa jeneama minabu bestichai en katukubainxanii’, aki en jabe yubakani shinankin ean miadi yubakin en mia ana mestenwaiin. ⁶Jakia matu inun matun bakebu ichai pakubaini ea chibankin jenetan en yunuti jancha inun en nemati jancha en jatu yusini jabun chibanma yushibu betsa betsapa duawakin jatu kenwainbun ⁷na mai pakea matun xenipabu en ibu wamani anua Israelin enabu betsekin akawatan en jatu putaxanii. Ja dikabi na kenwanti jiwe en pepa washina en ana shinankin mekeama ixanii. Ja dikabi tsuabuda jiwebaunabun Israelin enabukidi shinain kaxekubainxankanikiki. ⁸Ja

dikabi man ea jenexanai na kenwanti jiwe jawenduabia ibubis di iki janus maspua maniken dasibibun dainbaini e iki jaki kaxei tsuada yuka iki: ‘Na yudabu inun jatun kenwanti jiwe chakabuwakinan, ¿jaskakin Jehován jaska wanimen?’ ikaya ⁹tsuanda kemakin yuikin: ‘Jatun mekenika Dios Jehován jatun xenipabu Egipto anua jatu taxnimabiabidani jawen jancha jabun danankin ana chibanma yushibu betsa betsapa duawakin kenwankubainaibuwen taexun chakabu betsa betsapa jatu anu yunukin Jehován jatu kupinikiaki’, akin yuikubainxanikiki”, iki Jehová Salomónbe janchanikiaki.

**Sabá anua nawa ainbu xanen ibujaida Salomónbe janchanun ika
junikiaki, na janchadan**
(2 Cr 9.1-12)

10 ¹⁻² Jehová kenwain Salomón unanepajaidakunkainaya chanibaunaibu Sabá anua nawa ainbu xanen ibujaidatun Salomónkidi bana ninkatan jawen yukati tibi itimaskawen jawen unanepa unanti wanun ika chajjaidabiaken Jerusalén anu kai jawen mekenika kushipabu yuda jawenduabu ichapabube inun, jawen dayadubu ichapa inun, camello kamaki xeni ininti ichapaya inun, oro midima inun, jawen dauti jawendua betsa betsapa midima peumatan bekubidani atimas jikiabu Salomónen mekenikabun Sabá anua nawa ainbu xanen ibujaida iwexun Salomón bebun nichianbu ja ainbun jawen yukati itimaska inun bika jaska bebunkidi shinainma Salomón yukakubaina ³jawen yukati tibi bestibu kemakin Salomónen yuikubainkin keyua, jawada ainbu xanen ibujaidatun yukati betsa Salomónen juneama yui keyutidu inikiaki. ⁴Salomónen unanepa jancha ninkatan januxun jawen jiwe jawendua ewapajaida waima uin keyutan ⁵xanen ibun tapu anuxun piti pepa betsa betsapa jatu pimakubainmis uindiakin janu jawen unanepa xanen ibu bexmasbu pe jiwemisbu uin keyubaunkin jawen dayadubun tadi jawendua sawedia jabun pe shinain dayaxunkubainmisbu uindiakin xanen ibun piti inun jawen nexuti jawen tenanti dau jayamenkain, iwanan, ja dukuntun pikin mexunmis unantan xanen ibu pimakin nexumakin akubainmisbu uindiakin, Jehová kenwanti jiwe bebun chaxuwan tesenxun chiwen jawen yuda jidabi kuakin Salomónen akubainmis dasibi jaska shadabu uin keyutan jaska wamis uinkin shinain jaxpa daka e ikunkainkin ⁶ainbu xanen ibujaidatun Salomón kenwankin yuikin: “Min unanepa jancha inun jaska jawada shadabu min pewakubainmiskidi en mae pakea anuxun ea yuiabu en mikidi ninkakubainimadan, min chanimaki. ⁷Jakia jaska bestima ea kayabis juxun janunkain en beduwen uinkin jaska en ninkaima keska eskatian en mia ikunwantiduki. Mikidi pepa namakis

besti ea yuimabuki. Jaska en ninkakubainima min unanepa inun jamapai shadabu jayakin min ma binuaki. ⁸Mia dapi ichaxun min unanepa jancha ninkai minabus inun min unanepabu inun min dayadubu shinan chankain benimakubainmisbuki. ⁹Mia bechipaikin medabewakin Israelin enabu min jatu yunukubainxanun mia katuxun xanen ibujaidawaniwen taexun min mekenika Dios Jehová duawakin kenwanankanwen. Jawen nui paewen jawa kaneama min jatu yunukubainxanun Israelin enabu Jehován jatu bechipajaidakubainmiswen taexun xanen ibujaidawakin mia katuniki”, atan

¹⁰Januxun ainbun Salomón duawakin 3,970 kilo oro inun, xeni jawen iti ininipa midimajaida inun, jawen dauti jawendua betsa betsapa midimajaidadi Salomón jamen inankuinikiaki. Jati xeni ininipa ichapajaida Sabá anua nawa ainbu xanen ibujaidatun Salomón inankuini keska binumakin Israelin enabun mai pakea anu tsuan jati bexun inanma inikiaki.

¹¹Ja dikabi ja dukun Sabá anua nawa ainbu xanen ibujaida judiama Salomónen jaibu Tiro xanen ibujaida Hiramnen xaxu ewapabu mabu bemisbu mai pakea betsa jawen kena Ofir anua oro bexunbidanbidanmisbu inun jabiabundi ji betsa jawen kena sándalo inun mishki kadujaida ichapajaidadi Salomón anu bexuanbu ¹²Jehová kenwanti jiwe inun jawen jiwe ewapa jawendua anuxun jawa teketima wakin ja jiwen kebenbaunkin jau axanunbun Salomón jatu yunukubainkin jawen mimawati arpa inun salterio mimawanikabun jau axunkubainunbun Salomónen jatu yunudianikiaki. Jaska wanibu keska ja ji sándalo ichapa ana beabuma inun, natiandi tsuan ana jati beai nun uianmadiki. ¹³Januxun jawada shadabu Salomón anua bikatsis ikin Sabá anua nawa ainbu xanen ibujaidatun yuka inantan januxun ibubis Salomónen jawen inankuin jantsidi inanikiaki. Jaska wa jawen mekenikabu inun unanepa medabewamisbu inun jawen dayadubube jawen mai pakea anu jatube chintunkainikiaki.

Jeroboamnen Salomón dananikiaki, na janchadan

11 ²⁶Efraínen enabu juni betsa Nabatin juni bake Jeroboam mae betsa Seredá anua kaini chipu ma jawen epa mawaimaken jawen ewa Serúa beneumatun jawen bake Jeroboam yumewaima juni ewatan Salomón dayaxunbiai Salomón xanen ibuki sinatakin danankin ana chibanma inikiaki. ²⁷Jaska wakin xanen ibujaida Salomón Jeroboamnen danani matu yuinun ninkakanwen. Jerusalén anu janu Davidin ja dukun jawena wakin mae ibu wani: “Davidin Maeki”, iwanan, kenamisbu anuxun napaku mata wakin panpa waxun jawen mishki kene jatidi di ikai jau bena wakin pewaxanunbun Salomónen jatu yunua

dayakin taewaibun ²⁸jatube dayai Jeroboam juni kushipa yunu bedu inuinda uinkin bedu mestenwanxun Israelin bake Josén enabu jau jatu dayamakin jatu yunukubainxanun Salomónen Jeroboam katuxun xanen ibu bexmas jatu waxuinmaken

²⁹xaba betsatian Jerusalén anua kainkaini kai mae betsa Siló anua Diosun jancha yuixunika jawen kena Ahíasin yabukuti bena sawea bai puchinin Jeroboamki nukutan ja dabe besti nia tsuan uianma inun tsuan ninkabumaken, ³⁰jawen yabukuti bena Ahíasin pekaxun jawen meken dabewen tsumaxun tadi ushni ushni akin 12 watan ³¹Jeroboam yuikin: “Na en tadi en ushnixudan, 10 ushni bixun mekeyuxanwen. Jaska min biaidan, xabakabi mia yuinun ninkawe. Israelin enabu mekenika Dios Jehován mia yuikin: ‘Jau Israelin enabu ana jatun xanen ibuyamanun Salomónen enabu anua en jatu mebinxanaii. Jaska watan Israelin enabu 10 xukuabu min jatun xanen ibu ikunkainxanun en mia yunuxanaii. ³²Jakia Israelin enabu mae tibi anua Jerusalén katuxun en kena en janun netani inun en tsuma David en bechipainiwen taexun Israelin enabu xukua bestichai Salomónen enabu en jabu jenexunxanaii. ³³Salomón inun jawen juni bakebun en jancha ninkama danankin ea jenetan Sidón nawabu mekenika yushibu Astarté inun Moab nawabu mekenika yushibu Quemós inun Amón nawa mekenika yushibu Milcom duawakin jatu kenwanmisbuki. Jaskakubainaibu uinkin: Chakabukubainkanikiki, iwanan, en jatukidi shinanmiski. Ja dikabi jaska Davidin en jancha chibani keska wama en yunuti jancha inun en nemati jancha chibanbumawen taexun en jatu kupixanaii, 10 xukuabu mebinkinan. ³⁴Jakia David en katuni en tsuma ikunkainkin en yunuti jancha inun en nemati jancha chibain jiwekunkainiwen taexun jau xanen ibujaidanun en mekekubainxanaii. ³⁵Jakia Israelin enabu dasibi jau ana xanen ibuyamanun Salomónen bake en nemaxanaii. Mebintan en mia katuxanaii, Israelin enabu 10 xukuabu yunui min xanen ibu ikunkainxanunan. ³⁶Janu en kena ipaxanai Jerusalén en katuni anu meshu medan bin dekua keska en tsuma Davidin enabu juni bestichai katukubainkin ea bebunua Jerusalén anu xanen ibutidu, Israelin enabu xukua bestichai en jenekubainxanaii. ³⁷Jati yudabu min yunui xanen ibukin Israelin enabu xanen ibu min ikunkainxanun en mia katuxanaii. ³⁸Jaska en mia yunuai min akubainai inun jaska miandi bechipaikin chanima en yunuti jancha inun en nemati jancha en jatu yusini Davidin chibankin akubaini keska wadiakin min akubainai mia medabewai mibe ikunkainkin minabu en mia xanen ibu wamakubainxanaii, janua Davidin enabudi jatu xanen ibu wadiakubainkinan. Min jaska waya Israelin enabu en mia jatu ibu wamaxanaii. ³⁹Jatun chakabuwen taexun Davidin enabu pakubainaibu badi ichapa jatu kupikubainkin atimas jenekin en ana jatu kupiama

ixanaii' ", anikiaki. Jaska wakin Diosun jancha yuixunika Ahías Jeroboam yuimanikiaki.

⁴⁰Jaska Ahíasin Jeroboam yuishina Salomón tapintan jau Jeroboam tenanunbun jawen tsumabu yunua achitan tenanpananbun Egipto nawabu xanen ibu Sisac anu paxai ka, Salomón mawadiamaken jadi idui paxai kaima Jeroboam jiwekunkainikiaki.

Salomón mawanikiaki, na janchadan
(2 Cr 9.29-31)

⁴¹Salomón jawen unanepa jancha betsa betsapa inun dasibi jawen daya tibi akubaini ja miyui una medan jakidi kenenibukiaki. ⁴²Jerusalén anu jiwekin Israelin enabu dasibi yunui 40 año Salomón xanen ibukunkaini ⁴³atimas mawa mae mishki kenebaunibu jawen epa Davidin ja dukun mae ibu wani anu maiwabu janua Salomón xantukun jawen juni bake Roboam xanen ibui taenikiaki.

Israelin enabu yunui xanen ibu dabei paxkanibukiaki, na janchadan
(2 Cr 10.1-11.4)

12 ¹Xanen ibujaidanun ika Siquem anu Roboam kaken Israelin enabu dasibi jadi buxun jatun xanen ibu wakin katunibukiaki. ²Jamen betsadan, Nabatin juni bake Jeroboam Salomónen detepaia paxai Egipto anu junei kani jiweken ma Salomón mawaimaken Jeroboam jadi jiwebiaken jau junun ³jawenabu Israelin enabun Jeroboam kena chintunkidan jawenabu dasibibuki dasitan jau Roboambe jatu janchaxunun yunuabu Roboam yuikin:

⁴—Min epa nun dayaxunbia nuku daya bika tenemakubainimaki. Jaskawen taexun natian mianan, ja xankamajaida mei nun jawa juindukuntiduma ishian nun juindukunyunun jaskaida nuku daya kushipamama eskadabes nuku amakin yunukubainxanwen. Min nuku jaska waya nun mia duawakin axunkubainxanaii— akabu

⁵Roboamnen jatu kemakin yuikin:

—Matun jancha en shinan pewayuai buyutankanwen. 3 día binuaya ebe janchai ana betankanwen— jatu wa yudabu jatun jiwe anu buabun ⁶janua jawen epa Salomón jiweatian ja anibu unanepabun medabewakubainimabu yuikin xanen ibujaida Roboamnen jatu yukakin:

—3 día binuaya ja yudabu en jatu yuixanai ¿jadakidi man ea yusinkatsis ikai?— jatu wa

⁷janchanametan jabun yuikin:

—Natian min jatu yunukubainxanun Israelin enabun mia bechipaikin mia ma xanen ibu wakanikiki. Jaskawen taexun jaska shinainbu keska jatun jancha ninkakin jatu medabewanun, iwanan, daewati jancha pepawen jatu yuixanwen. Min jatu jaska wa mia chibankubainxankanikiki, xanen ibujaida wakanan— akabu

⁸Januxun jawen epan anibu unanepabun jancha Roboamnen jawa jatu ninkakin chibankatsi ikama jakia jabe yumenibun medabewakatsis ikaibu Roboamnen jabudi ⁹yukadiakin:

—Jaska en epan jatu dayamakin bika tenemajaidakubainima en bika bexmas jatu waxanun ea yukashinabu jaska en jatu yuixanun ¿jadakidi man ea yusiain, jatu jaska yuixanunan?— jatu wa

¹⁰ja jabe yumenibun kemakin:

—Ja yudabun jaska min epan jatu dayajaidamakubainima keskama jau ana bika tenechakayamakubainunbun mia yukashinabu eska jatu yuixanwen: “Chanima en epa kushipajaidakin matu yunuchakayamaima keska ean ja binumakin en matu yunuchakayamaxanii. ¹¹Dayamakin matu bikajaida tenemabiainmeken binumakin en matu ana bika tenemachakayamakubainxanii. Kupikin awa bichiwen en epan jatu matu kusha kusha amakubainimaki. Jakia ean matu jatu kupimakinan, bichi mane kushipa denetameyawen en jatu matu kusha kusha amakubainxanii”, akin jatu yuixanwen— akabu

¹²jaska Roboamnen ja yudabu mae anuabu ja janu bexanunbun jatu yuishina ma 3 díaken Jeroboam yudabube Roboam anu ana beabu ¹³januxun anibu unanepabun jancha danankin jawa jatu ninkama jancha kushipawen jatu kemakin ¹⁴jaska jabe yumenixun yusinchakashinabu jabias chibankin jatu yuikin:

—En epa kushipakunkaini keska eadan, kushipajaidakin en epan matu apauni en matu binumaxanii. Jatun matu dayamakin matu bikajaida tenemabiakubainimaken binumakin en matu bika tenema chakayamakubainxanii. Kupikin bichiwen en epan jatu matu kusha kusha amakubainimaki. Jakia eandi kupikin bichi mane kushipa denetameyawen en jatu matu kusha kusha amakubainxanii— jatu wa

¹⁵Siló anu Diosun jancha yuixunika Ahías Jehován janchamakin jaska bebunkidi Nabatin juni bake Jeroboam yubaimawen taea xanen ibujaida Roboam jaska Jehován shinainma keska jau inun Israelin enabu dananmaya jatun jancha Roboamnen jawa ninkamaken

¹⁶xanen ibujaida Roboamnen jaska bechipaiaibu jatu axunkatsi ikama jawa jatu ninkama ibubis ikaya Israelin enabu xukuabu xanen ibubu inun anibu unanepabun uinkin unantan jawaida yuinamei shinan betsaibun jabias shinainbu keska juni betsan jatu kemaxunkin jui kushipawen xanen ibujaida yuikin:

“Chanima, nukubudan nun jawa Davidin enabumaki.

Jesén enabube jiwekunkaini nun jawa jatun jamapai biama ikunkainxanii.

Davidin enabu xukuabu bestichai ibubis jatumebi xanen ibutidubuki. Jaskakenan, enabu Israelbuun, nukun jiwe tibi budinankanwen”,

jatu wa jawen jancha ninkatan jenebaini Israelin enabu 10 xukuabu nortekidi jatun mae tibi jawaida buake buakeaibun

¹⁷⁻¹⁸ Jau jatu ana dayamakubainun kushipawen jatu dayamakubainmis xanen ibu Adoram xanen ibujaida Roboamnen ana yunukin nichian Israelin enabu 10 xukuabu anu kaxun jatu ana dayamapanan jaki sinatakin maxax tunkewen tsaka tsaka akin tenanshinabu jaska washinabu Roboamnen ninkatan jatuwen datei jawen caballon tadanbaintiki jawaida inatan Siquem anua paxai Jerusalén anu kai jikia Judán enabun mae pakekauana anu Israelin enabu jiwebaunabu besti yunui Salomónen bake Roboam jatun xanen ibu ikunkainaya ¹⁹ jaska kainimawen taea Israelin enabu 10 xukuabun danan taewabainibu Davidin enabu ana jatun xanen ibumawen taea danananantiani natian jabiaskas ikubainmisbukiaki.

²⁰ Egipto anua Jeroboam ma chintuinmaken Israel enabu dasibibun unantan ja xanen ibujaida wakatsi ikin Jeroboam kenabu jua Israelin enabu dasibi ichabu anuxun xanen ibujaida wakatsi katukin jatun xanen ibujaida wabu Davidin enabu xanen ibujaida Roboam tsuan ana ninkakin chibanbumajaidaken jakia Judán enabun Davidin baba Roboam ninkakin jabun besti chibankubainaibun

²¹ Israelin enabu anu ana jatun xanen ibujaidakatsis ikin 10 xukuabube detenamekin binutan jatun xanen ibunun ika Jerusalén anu ana jikixun Judán enabu mae tibi anua inun Benjamínen enabu mae tibi anua detenamea unanjaidaiibu katukin 180,000 detenamenikabu Roboamnen jatu ichawakin keyuken ²² jaskaibu Diosun uinkin juni betsa jawen kena Semaíasin Dios chibanjaidamis ja Diosun yunukin yuikin:

²³—Salomón bake Roboam Judá xanen ibu inun, Judán enabu dasibi inun, Benjamínen enabu dasibi inun, jatidi Israelin enabu min mai pakea anu jiweabu jatu ea nemaxunkin yuikin: ²⁴“Jehován matu yunuikiki. Matun betsabu Israelbubedan, ana jatube detenameyamakanwen. Jaska shinankin en matu paxkaimawen taea matun mae tibi anu chintunbainkanwen”, akin jatu ea yuixuntanwen— aka Semaías kaxun ja detenamenikabu jatun xanen ibubube Jehován jancha jatu yui keyua jaska Jehován ma jatu yunua ninkatan Roboam jenebaini Jehován jancha ikunwain jatun mae tibi chintuainbun

Jeroboamnen yushibu betsa kenwanti dami dabe jatu amanikiaki, na janchadan

²⁵ Efraínen enabu mai pakea mati matipa anu jawen maewan Siquem anu jiwexun Jeroboam xanen ibujaidai taekin jawen mishki kenebaunibu ana jatu bena wamakin maewan jidabi jau pewanunbun jatu yunuxun jatu uinkubaina jawen yunua chibankin akin keyuabun janua Jene Jordán kexa betsaudi Penuel anu ja maedi jau pewanunbun

Jeroboammen jatu yunua pewakin keyudianibukiaki. ²⁶⁻²⁷Januxun Jeroboam datekin shinankin: “Jehová kenwanti jiwe Jerusalén anu buxun Jehová kenwankin chaxuwan tesenxun jawen xeni inankin kua keyukin jawen nami bawaxun Jehová bebunxun pi año tibi Jerusalén anu butan butankin ana Judán enabu xanen ibujaida Roboam bechipaimakin taewatidubuki. Jaska wakin ea jatu tenanmatan januxun Roboam ana chintuin jatun xanen ibujaida itiduki”, ikin

²⁸jaska shinantan chipu jawen unanepabube janchanamei metetan oro ina awa bake bene dami dabe Moisin betsa Aarónen ani keska jau anunbun jatu yunua akin keyuxun jatun xanen ibu bu inun yuda ichapabu bebun nichianbu metukin Jeroboammen jatu yuikin: “Jerusalén anu kaxun Jehová kenwain ma chai butan butanmisbu bikawen taexun na mekenika yushibu dami dabetun Egipto anua nukun xenipabu jatun jatu paxawanidan, naki”, jatu watan ²⁹Betel janu jawen Dioski nukuti tadi jiwe puntenibu anu ina awa dami bestichai jatu bumaxun nichinmaxun januxun ina awa dami betsa nortejaidakidi mae betsa jawen kena Dan anu jatu buma jatube kaxun jatu nichinmadiaken ³⁰ja oro ina awa bake bene dami dabe Betel inun Dan anuxun kenwain Jehová Dioskidi Israelin enabu chakabui taeabun ³¹ja dikabi mati keyatapa betsa betsapa anu jatun yushibu kenwanti jiwe ichapa Jeroboammen jatu wamatan jau jawenabu jatun dios benabe janchaxunikabu ikubainxanunbun Levín enabuma jatu katutan ³²⁻³³januxun Judán enabu Jerusalén anua janu besimisbutian jabias xabatiandi Jeroboammen jawenabu jabianudi jatun besiti bena waxunkin ja jabias octavo uxe xaba 15tian Betel anuxun jatu amashinxun taewakin jawenabu oro ina awa bake dami wamashinxun janu jatu mestenwanmakin jatun yushibu dami kenwankin inabu menukin jau kuakubainxanunbun ibubis shinankin Jeroboammen jatu yunuima jawenabu jatun dios benabe janchaxunikabubetan jau apakexanunbun Betel anuxun jawen kenwanti chi tapu waimabu anuxun Jeroboammen inabu nami inun jawen ininti xeniyabi menu keyukin jatu taemanikiaki.

**Israelin enabu anu Ahab xanen ibui
chakabujaida inikiaki, na janchadan**

16 ²⁹Ma ³⁸año kai Judán enabun mai pakea anu Asá xanen ibuxunkunkainaya nortekidi Israelin enabu 10 xukuabu anu jatun xanen ibujaida Omrí mawashinken jawen xantukun jawen bake Ahab jadi xanen ibui taeima Samaria maewan anu jiwexun 22 año jatu yunukubainikiaki.

³⁰Jakia Jehová bebunua jawen aka tibi chakabujaidakin jawenabu xanen ibu chakabujaidabiai mawaida jaskama ipaunibuken atimapa wakin jatu binumajaidanikiaki.

³¹Nabatin bake Jeroboammen Jehová danankin chakabuwakubaini keska wakin Ahabin jawa shinanma ana atimapajaidakin Sidón nawa xanen ibu Et-baal ainbu bake Jezabel ainwantan jatun mekenika yushibu jawen kena Baal duawakin kenwankubainkin taewanikiaki. ³²Januxun jawen maewan Samaria anu ja yushibu Baal kenwanti jiwe inun jawen kenwanti chi tapu jatu wamanikiaki. ³³Ja dikabi yushibu ainbu Aserá ji dami jatu wamaxun jatu nichinmatan jaska wakin Israelin enabu mekenika Dios Jehová sinatajaidamakin Israelin enabu xanen ibu betsabu binujaidanikiaki.

³⁴Ahab xanen ibuitian juni betsa Betel anua kaini jawen kena Hielin maewan xeni Jericó ana benawanikiaki. Hielin mae kenebaunun, iwanan, jatu mai pukinmaya jawen juni bake iyua dukun Abiram mawai taenikiaki. Chipu jawen mishki benibaunkin keyutan jawen jenekin jawen jikiti xui beputi jatu netanmanun, iwanan, Hielin jatu yunuaya jabiatiani jawen bake maxkudi Segub mawanikiaki, jaska Nunen bake Josué Jehován bebunkidi yupumakin yuimakin tsuanda Jericó bena waitianan, jatun juni bake dabe mawaxanikiki, ani chanima jaskanikiaki. Jawen bakebu jaskabiaya atimas Jericó bena wakin Hielin jatu keyumanikiaki.

**Ui ana ikama mai taxkai keyuxanai xanen ibujaida
Ahab Elíasin yuinikiaki, na janchadan**

17 ¹Mai pakea Galaad anu jawen mae Tisé anu jiwea Diosun jancha yuixunika Elías Ahab xanen ibujaida anu kaxun dateama yuikin: “Israelin enabu mekenika Dios Jehován ea ninkaya en mia yuiaai, en ja dayaxunmistun kenawenan. Eska ikunkainxanikiki. Ea ninkawe. Año tibi ikunkainaya en yunudiama ui ana ikama inun basnun ana butuama ixanikiki”, abaini kaya

²⁻³jaskawen taea Jehován ana Elías yuikin: “Badi juaikidi paxai nenua kadiwe. Jene Jordán pukebaini ukedi paxku Querit anu juneditanwen. ⁴Januxun paxku unpax min akubaintiduki. Jau mia piti buxunkubainxanunbun isa meshupa peiyabu ma en mia jatu katuxun yunuxunxuki”, aka

⁵jaska Jehován yunua badi juaikidi Jordán pukebaini kai paxku Querit anu bashikua jiwei kaken ⁶penama inun badi kaya tibi misi inun nami ba bixun isa meshupabun buxuntantanabu pikin paxku unpax akubainaya ⁷jakia ja mai pakea anua xaba eskadabes ui ana ikamaken paxku netsui taxkai keyuaya

**Sarepta anu nawa ainbu jawen bene ma mawanitun
jiwe anu Elías kanikiaki, na janchadan**

⁸⁻⁹januxun Jehován Elías ana yunukin:
—Benitan Sidón mai pakea anu mae betsa Sarepta anu katanwen. Jadi niti ika jiweyutanwen. Ainbu betsa jawen bene ma mawani jiwea

anu jau jatun mia pimakubainxanun mia pewaxunkin ma en mia yunuxunshinaki— aka

¹⁰ninkatan Elías kakunkaini Sarepta anu jikitan jawen jikiti xui dapi niti itan ainbu jawen bene ma mawaniken kadu metax bi kaxun ichawai Elíasin uinkin yuikin:

—Ainbuun, unpax en manuai kenchaki bitanxun menan ea amadiyuwe— aka

¹¹bixuntanun ika kai dabekekainaya Elíasin ana kenakin yuikin:

—Ja dikabi misi tude betsa ea bexundiatanwen— aka

¹²niti itan kemakin yuikin:

—Jaska min mekenika Dios Jehová jiweken en mia padanmaki. Jawa misi ba en jayamaki. Xekiwan dudu mespu besti shumu medan en mekea inun piti xeni eskadabes shumu betsa medan ja besti en jayaki. En juni bakena inun ena na jabiatian keyu jawen bawakatsi en kadu benayuaki. Jatis besti bawaxun pitan chipu buni tenei nun mawaxanaii— aka

¹³⁻¹⁴Elíasin kemakin yuikin:

—Dateama en jancha ninkawe. “Israelbun Diosun ma nuku pewashinaki. Mai anu Jehován ui ana imadiamaken min xekiwan dudu shumu medan inun min piti xeni shumu betsa medan min jayadan, netsuama ikunkainxanikiki.” Jaskawen taexun dateama ea bawaxuntanwen. Ja dukun min jaya misi jatiuma waxun ea bexunwen. Jaska watan chipu mina inun min bakena misi betsa min bawatiduki— aka

¹⁵⁻¹⁶ninkatan ikunwanbain jaska Elíasin yunua kaxun misi jatuna inun jawena inun jawen bakena jatu bawaxuna piabu janua xekiwan dudu shumu medan jawa keyuama inun piti xeni shumu betsa medan jaya jawa netsuama jaska Jehován Elías yuima keska uxe ichapa ja ainbu inun jawen bake inun Elíasin misi pikubainibukiaki, ui ikamabiakenan.

¹⁷Jatianda ja ainbun juni bake isin tenei taeshina pikukunkaini ana jadakidi juinsinatima tsusabaina dakaken ¹⁸jawen ewa datejaidakin Elías yuikin:

—Dios anua juniin, ¿jaskada nun uinanain? mia inun eadan. En chakabukunkaini ea shinanmakin ¿en bake debuwanun ika min ebe jiwei juimamen?— aka

¹⁹Elíasin kemakin yuikin:

—Min bake ea inanwen— atan jawen bake xankishkumea bitan dintu manaundi janu uxamis anu mapemaxun jawen dakati anu datanxun ²⁰nuijaidakin jui kushipawen Jehová yukakin:

—Jhová en mekenika Diosuun, na ainbu beneuma bika tenemakin min nuitapawai en jawen jiwetan ikadan, ¿jaskakin jawen bake min tenanain?— atan

²¹ja bakeishta mamaki beuxun Elías nuijaidakin Jehová yunukin:

—Jehová en mekenika Diosuun, bakeishta jawen yushin ana iwexun jaki nanewe, jau ana jiwenunan— atan benitan ana dabeki jaki beuxun jabias Jehová dabeki yukaya

²²Elíasin jui Jehován ninkatan bakeishtan yushin ana jaki nanea juinsinai ana jiweaya ²³Elías jawaida benitan bakeishta ikubidani tapa manaundia butuxun ibuan dintu anu jikitan jawen ewa inankin yuikin:

—Uinwen. Na min bakedan, ma ana jiweaki— aka

²⁴ainbun kemakin yuikin:

—Jaska min ea axunxuwen taexun chanima min Dios anua juniki. Jehován jancha chanima min yuimis ikis en mia unanjaidaii— anikiaki.

**Xanen ibujaida Ahab anu Elíasin uin ana jaki
nukui kanikiaki, na janchadan**

18 ¹Ainbun jiwe anu jiwea 3 año binukainaya Jehován Elías yunukin yuikin: “Nenua kaxun Ahab jancha wakin uin ana kaditanwen. Min janu kaken mai anu ui en ana jatu yunuxanaii”, aka ²jaska wa ninkatan Ahab uinun ika Elías kaya jabiatiani Ahabin mai pakea inun jawen maewan Samaria anu dasibibu buni paepa tenejaidaibun, ³Abdíasin jawen xanen ibun tsumabu yunukin jawen jiwe anu dasibi mekexunmis Jehováki mesejaidakin jawen jancha chibankin kenwankubainmis Ahabin ja jawen dayanika xanen ibu jabe janchakatsi kena junikiaki. ⁴Jehován jancha yuixunikabu jau jatu tenanunbun Ahabin ain Jezabelin jatu yunukin taewaitian 100 Jehován jancha yuixunikabu Abdíasin june jatu ichawaxun paxkakin 50 tibi xuku dabe watan mai kini xui ewapa dabe anu jatu junekin aduimaxun uxe ichapa misi inun unpax besti jatu pimakin inankubainaya ⁵Abdías Ahab anu jua yuikin:

—Nukun maewan Samaria chai kesukauna anu chacha tibi inun paxku debu tibi uinkubaunanwen. Nukun caballo inun nukun mula jau jiwekubainyununbun nun basi jatu bechixuntidumenkain. Nun jatu bechixunamaken nukun inabu mawai keyuaibun nun jawa inabu ana jayama ixanaii— aka

⁶jawen maewan Samaria kesukauna anu kai paxka dabetan uinbaunun ika xanen ibujaida Ahab bai betsawen kaya Abdías bai betsawendi kaya ⁷ma bai betsawen paxkabaini buaibun Elíasdi taxnidiakidani Abdíaski nukuai Elías unantan ja bebun di itan beti ixun yuikin:

—Min en xanen ibu Elíasdan, ¿jabia min miamen?— aka ⁸kemakin Abdías yuikin:

—Jaa, jabia en eaki, Elíasdan. Kaxun min tsuma yuiditanwen, en nenu niakidan— aka

⁹kemakin Abdíasin yuikin:

—¿Jawa chakabu en waimawen taexun Ahab anu min ea yunui ikai, en mikidi banabima jau ea tenanunan? ¹⁰Jehová min mekenika Diosun

ea ninkatan ea kupitiduwen taexun en mia padanmaki. Jaska Ahabin jatu amaimakidi mia yuinun ea ninkawe. Nawabu betsa betsapabu anu inun xanen ibubu midima jiwebaunabu dasibi anu mia benakin jau jatu yukakubaununbun juni midima en tsumapan jatu yunuyamaki. Jania mia bechitiduma jabun Ahab yuikin: “Nukun mekenika yushibubun nuku kupitiduwen taexun chanima en mia yuiiai: ‘Elfaski jania nukukin nun bechitidumajaidaki’, akabu jatu yuikin jatu yubakubaunyamaki. ¹¹ Mikidi jatu jaska wabiyamaken kaxun: ‘Elías ua nia’, akin en tsuma min ea yunukin yuimai ikaii. ¹² Min ea jaska wamatidu mia yuinun ninkawe. En mia jenebainaya janu en unanma anu Jehová Yushinen mia iyuya Ahab anu kaxun mikidi en banabima nenu jua Ahab miki nukukin mia bechiama yuikin: ‘Min chanichakaii’, ixun ea tenanxanikiki. En min dayadudan, jamen bedunantun Jehová kenwankin taewanixun jawa jeneama en kenwandiakubainaii. ¹³ Jamen betsadan, Jehová jancha yuixunikabu jau jatu tenanunbun jawen ain Jezabelin jatu yunukin taewayá 100 Jehová jancha yuixunikabu jatu ichawaxun xuku dabe 50 tibi waxun jatu junekin mai xui ewapa dabe anu jatu mistuimaxun misi inun unpax en jatu pimakubainmis ¿min ekidi ninkadiamamen? ¹⁴ Ea kaxun: ‘Elásdan, ua ma jua nia’, akin en tsuma en yuia ea tenanxanikiki” — aka

¹⁵ daewakin kemakin Elíasin yuikin:

—Jehová kushipatun dasibi binua en dayaxunmiswen taexun en mia yubaii. Na jabiatian chanima Ahab bebun en nia ea uinkiki— aka

¹⁶ Abdíasin Elías uinxu jawen xanen ibuki jau dateyamanun daewa benai kai jaki nukui kaxun yuia: “Jani uinun kawé”, ikain Elíasiki nukui kaxun ¹⁷ bechi tushitan Ahabin yuikin:

—Israelin enabu jatun shinan min jatu itimaska wamisdan, ¿min miamen?— aka

¹⁸ Elíasin kemakin yuikin:

—Jaskamaki. Israelin enabu ean en jatun shinan itimaska waismaki. Jakia Jehová yunuti jancha danankin jenenixun mia inun minabun yushibu Baal dami betsa betsapa duawakin man kenwankubainmiswen taexun Jehová matu kupikubainikiki, ui matu inanmadan. ¹⁹ Nukunabu Israelin enabu junibu dasibi inun ja jabu 450 Baalin jancha yuixunikabu inun 400 Aserán jancha yuixunikabu jabu min ain Jezabelin mekekin pimakubainmis Mati Carmelo anu jau jatu ichawanunbun jatu yunuditanwen, ikisdan— aka

Baalín jancha yuixunikabube Elías unantinandabenibukiaki, na janchadan

²⁰ Ahabin Elíasin jancha ninkatan Israelin enabu junibu dasibi inun Baal inun Aserán jancha yuixunikabu Mati Carmelo anu jau ichaxanunbun jau jatu yuibauntanunbun Ahabin jatu yunua buxun jatu yuiabu bebidan bebidani Mati Carmelo anu ma ichai keyuabun ²¹ Israelin enabu dasibibu ma ichabu anu Elías jatu dapi kaxun yuikin:

—¿Na shinan dabedan, jatian kaya man ana taewabainxanai? Jehovádan, jawen mekenika Yushin Kayabikenan, ja besti chibankubainkanwen. Jakia Baaldan, jawen mekenika Yushin Kayabikenan, ja bestidi man chibankubaintidubuki. Jadatuda katukanwen, ja dabe chibanmadan— jatu wa ja yudabu jawa jancha betsa taska yuimabumaken ²²Elíasin ana jatu yuikin:

—Jehován jancha yuixunika ea besti bashikuima en jiweaki. Jakia 450 Baalin jancha yuixunikabu jiweabu ja mapukana. ²³Ja man chibanunbun nun matu axunkin uinmai. Jaskawen taexun ina awa bake bene dabe nuku inankanwen. Jabun bestichai katuxun tesenxun jawen bichiyabi mexte mexte axun kadu ichapa mania anu nami manchintidubuki, chi keti wamadan. Eandi ina awa bake bene tesenxun bichiyabi mexte mexte axun tadi kadu ichapa mania anudi en manchindiai, chi keti wamadidan. ²⁴Matun yushibubu medabewati yukakanwen, jakia eanan, Jehován medabewati en yukadiaidan. Jadatutunda nuku kemakin nami inun kadu anu chi yunuaya jadan, mekenika Dios Chanima Kayabiki— jatu wa dasibibun kemakin yuikin:

—Min shinan peki. Jaska wanankanwen— iki keyutan kadu ichapa inun ina awa bake bene dabe ma jatu bexuanbu

²⁵januxun Baalin jancha yuixunikabu Elíasin jatu yunukin:

—Matudan, man ichapaki. Matun dukun ina awa bake bene katukanwen. Katutan kuakin keyunun, iwanan, dasibi pewatan matun mekenika yushibubu yukabaunkanwen, jakia chi ketiwamadan— jatu wa

²⁶ina awa bake bene ma bexun ma jatu inanbu tesenxun bichiyabi mexte mexte akin pewaibun jabiatandi jatiditun mishki manchinkin chi tapu waxun kadu ma beabu ja mamaki manchinkin keyuxun menunun, iwanan, nami kadu mamaki manchindiaxun penama jawen mekenika yushibu Baal yukakin taewakin:

—¡Baaliin, Baaliin, nuku kemawe, chi yunukinan!— aki penama atiabu kauani 4 hora jabias jancha yuikubaini chi tapu dunkebauni ishchu ishchu iki jeneabumabiaken jakia jui inun chiwen jawa jatu kemamajaidaken ²⁷ma badi manananbiken Elíasin jatu kaxewakin jui kushipawen jatu yuikin:

—Matun mekenika yushibudan, ana jui kushipawen ninkamakanwen, daya betsa akin matu ninkamamenkainan. Jaska inun, pui kamenkain. Jaskamadan, bai kamenkain. Jaskamadan, ma uxamenkain. ¡Datekin bestenwankanwen!— akin jatu kaxewakin jeneama yuikubainaya

²⁸sinatai jatun beya chibain sai sai iki ishchu ishchu ibauni nupewen jatumebi siku siku iki ibubis chachi chachi ikabu jimin iduma nashia keska ikaibun ²⁹ma badi manananbi binukainaya jawa jeneama nishi pae aka paeen keska unanyamasi sai sai iki ishchu ishchu ibiakubainaibun tsuan ninkatan jawa tsuan juiwen jatu kemamaken ma janu badi kaitian

Jerusalén anuxun Jehován kenwanti jiwe anuxun inabu jidabi janu jatu kuaxunmisbu kemaya Baalin jancha yuixunika dasibibun yukakin jeneaibun tsuan jawa kemama inun tsuan jawa jatu ninkamawen taexun³⁰ Israelin enabu dasibi Elíasin jatu yuikin:

—Ma matuna en uinxuki. Enadi ea dapi bexun uin bekanwen— jatu wa ja dapi dasibi bea jidabi mapuabun Jehová kenwanti chi tapu wanibu ma di iyama Elíasin bena wakin³¹ Jacob, Jehován kena betsa wakin Israel wani, Jacobun juni bakebun enabu xukuati 12 keska mishki ewapabu katutan pewanikiaki.³² Ja mishki biai Jehován yunua jawen kenwanti chi tapu Elíasin bena wakin keyutan ja mishki mania anu dunkemabaunkin janu jene matati wakin mai pukinbaunkin watan janu 20 litro jexe manebaunti nati akin keyuxun³³ kadu ichapa manchin pewabaunkin keyutan ina awa bake bene tesentan jawen bichiyabi mexte mexte atan kadu mamaki manchinkin keyutan³⁴ jatu yuikin:

—En matu padanyamanun Ianenwan anua 4 shumuwanki unpax matawatan bexun na nami inun kadu anu unpax maukakin cha akin keyukanwen, pantu tsaunkinan— jatu wa ninkatan buxun unpax bitanxun jukakin ja nami inun kadu cha akaibun Elíasin jatu ana jabiaskadi yunua ana unpax bitanxun nami inun kadu ana cha akabu Elíasin jatu ana jabiaskadi yunua jawen jancha ikunwankin ana unpax bitanxun ana nami inun kadu cha akin keyuaibun³⁵ januxun kenwanti chi tapu mishkidi mecha wakin mai pukinbauna anudi unpax matai keyua³⁶ Jerusalén anuxun Jehová kenwanti jiwe anuxun inabu jidabi kuaibu jabiatandi Diosun jancha yuixunika Elíasin chi tapu dapi nixun jui kushipawen yuikin:

—Abraham inun, Isaac inun, Israel mekenika Jehováan, Israelin enabu dasibi mekenika Dios min mia inun en min tsuma min ea yunushinawen taexun natian dasibi en abaunxu uinkin jau unanjaidanunbun ¡kikis jatu uinmawe!³⁷ Min jatun mekenika Dios Kayabi anu jau mia ana chibankatsi chintununbun jatu kenawe. Na yudabu mapubaunabun jau unanunbun Jehováan, ¡ea kemawe! ¡Chiwen ea kemawe!— atan

³⁸benanta ka niken samama Jehován chi yunua manaundia chi xawakakidan chi tapu anu tin ikin ina awa nami inun, kadu inun, 12 mishki ewapabu inun, mai pukinbauna anu unpax matadi netsu keyuai³⁹ jaskai uintan datejaidai dasibibu beni keyutan main beti ixun kenwankin: “¡Jehová nukun mekenika Dios Kayabiki! ¡Jehová nukun mekenika Dios Kayabiki!” ikeakebaunaibun

⁴⁰januxun Elíasin jatu yuikin:

—Baalín jancha yuixunikabu dasibi jatu achikanwen, jau betsa paxayamanunbunan— jatu wa jawaida jatu achiabu paxku netsu Quisón anu jatu machi butemabain Elíasin jadixun jatu yunua dasibi jatu tesen keyuabun,

Jau ui yununun Elíasin Jehová ea anikiaki, na janchadan

⁴¹jatu jaska wamatan Elíasin Ahab yuikin:

—Ui ichapa ma kudu iki danka ikai en ninkaiwen taea kaxun pikin jawada nexutan inun kadiwe— aka

⁴²Elásin jancha ninkabaini kaxun pikin nexutan Ahab kaya jakia Elías Mati Carmelo keyatapajaida anu ana mapekekaini ka nixun, Jehová ea anun ika danti itan jawen betunku shui iki beti itan ⁴³Elásin jawen dayadu yuikin:

—Ianenwankidi kaxun uintanwen— aka
kaxun uinbauntani Elías anu chintunkidan yuikin:

—Naiudi jawa jayamaki— aka
jakia Elásin ana yunukin:

—7ki katan katankin uintantanwen— aka

⁴⁴jaskabiatantankin jawa uianma atimas jawada uintan chintunkidan yuikin:

—Unu chaikea nai kuin meken tiu tsami pishta dama jukin en uinbidanai— aka

benitan Elásin yuikin:

—Kaxun Ahab yuiditanwen: “Janun jau ui bekin mia nemanun min caballon tadanbainti pewatan min jiwe anu kadiwe, akin mia yuikiki”, akin yuitanwen— abiatan jabia dabe butukidani

⁴⁵jawen dayadun Ahab yuia meshu meshuchakayamai niwe kushipa xunku ikaya ui midima ikaya jawen caballowen Ahab inakaini mae Jezreelkidi kaya ⁴⁶jabiatiandi Jehová Elías kushipa inanyan jawen tadi chaipa binibidan jawen chinexeketiki usuntan kushikainkin Ahab binunbaini Elías dukun Jezreel anu jikiken,

Mati Horeb anu Elías paxanikiaki, na janchadan

19 ¹jaska Elásin axu inun jaska Baalin jancha yuixunikabu dasibi jatu tesenmaxu Ahabin jawen ain Jezabel banabimawen ²taexun Jezabelin ninkatan jawen jancha bunika yunukin yuikin: “Eska Elías ea yuixuntanwen: ‘Miadan, min juni Elásiki. Eadan, en ainbu Jezabelki.

¡Jaska enabu Baalin jancha yuixunikabu dasibi min tesen keyuxu keska wakin meshukidi na jabia baditiandi en mia jabiaskadi wadiama yushibubun jau ea kupichakayaxanunbunwen!’ iwanan, ‘mia yuixuki’, akin ea yuixuntanwen”, aka kaxun jawen jancha Elías yuia,

³ninkatan jaki datejaidai jawen jiwea mekei jawen dayadu iyui Judán enabun mai pakea surkidi chaijaida Beerseba anu kai jikixun jawen dayadu bashibaini ⁴ana surkidi ja mesti bai tanabaini jadi tsua jiweabuma anu xaba bestichai badi chaitanabaini ka punu nuka ji chanpa jawen pei tupan utapan anu tsaua punu nukai jin iki mawakatsis ikin Jehová yuikin: “Jehováan, jatiski. En ana bika tenetidumaki. En xenipabu en jawa jatu binuamaki. Menan ea tenankin en jiwea ea bidiwe”, atan

⁵jabianu ji tupan utapan naman daka uxajaidaken nai tsuma juxun datekin bestenwanxun yuikin: “Benitan pidiwe”, aka

⁶bestentan uinbaunkin jawen buxkakidi mishki mamaki chi kujaidaiwen misi dama bawaxu inun unpax shumuki mata bechitan benikauan misi pikin unpax nexutan ana jabianudi dakatan uxaya ⁷ana ja kachu Jehován nai tsuma juxun ana datekin yuikin: “Ana benitan pidiwe. Min jadi kaidan, chajjaida nenumaki. Ichapa min piama chajjaida kai min ana punu nukatiduki”, aka

⁸Elías benitan misi ichapa pikin unpax ichapadi akin yaniwa ma ana kushipawen taea bai tanabaini 40 día inun 40 meshu kai Diosun Mati Horeb anu jikia, ⁹mawa puchinin mapekea mishki kini xui betsa anu jikia meshu medan uxashini bestenkainaya Jehová jabe ana janchakin yuikin: “Elásiin, ¿nenu juidan, min jawa shinain min jushianmen?” aka

¹⁰Elásin kemakin yuikin: “Jhováan, en mia yaushijaidaii, miwen nuijaidaidan. Min nukun mekenika Dios kushipajaida dasibi binuawen taeadan. Jaska en xenipabube min jatube yubakabiani Israelin enabun mia jenetan mia januxun kenwanti chi tapu di akin keyutan jatun machatu chaipa kenujaidawen min jancha yuixunikabu jatu tenankin ma keyuyamabuki. Ea besti en jiwea eadi tenanun ikin ea benakanikiki”, aka

¹¹Jhován ana yuikin: “Nedi xabakan kainwen. Mati puchinin anu ea bebun niwe”, atan Jehován dainbainaya jakimamadi besuudia niwe kushipajaida bekin mati pudekin mishki tuax akaya jakia niwe medan Jehová jayamaken, niwe mainbainaya janua pacha sakudiaya pacha sakuai medan Jehová jayamadiken ¹²pacha sakui maianyan chi jede ji ji ikaya jakia ja chi jede medan Jehová jayamaken chi jede nukai mainkainaya unanxubida jui xa ikai ninkaya ¹³jaskai ninkatan jawen datei Elías jawen yabukutiwen jawen besu beyabukutan taxnikidan kini kexa niken, jancha taxnikin yuikin: “Elásiin, ¿min jawa shinanbidanshina janu nia ikai?” aka

¹⁴Elásin kemakin yuikin: “Jhováan, en mia yaushijaidaii, miwen nuijaidaidan. Min nukun mekenika Dios kushipajaida dasibi binuawen taeadan. Jaska en xenipabube min jatube yubakabiani Israelin enabun mia jenetan mia januxun kenwanti chi tapu di akin keyutan jatun machatu chaipa kenujaidawen min jancha yuixunikabu jatu tenankin ma keyuimabuki. Ea besti en jiwea eadi tenanun ixun ea benakanikiki”, aka

¹⁵Januxun Jehován yuikin: “Jabiaskabiaken jadidi ana kama min jushiankidi ana jawendi chintunkaini Damasco dapi janu tsua jiweabuma anu kaxun juni betsa Hazaelki nukuxun jau Siria nawabun xanen ibujaidaxanun xeni ininti maukakin katutanwen. ¹⁶Ana kai Nimsín baba Jehúki nukuxun Ahabin xantukun jau Israelin enabu xanen ibujaidaxanun xeni ininipa maukakin katudiatanwen. Ana kai mae betsa Abel-meholá anu Safatin juni bake Eliseoki nukuxun min xantukun jau en jancha jatu yuixunika ixanun xeni ininipa maukakin ea katuxundiatanwen. ¹⁷Jabu eskaxankanikiki. Israelin enabun jabun ea

danankubainaibu Hazaelin detenamenikabun jatu tenankin taewaibun jatu anua paxaibu Jehún detenamenikabun jatu detediakin taewadiaibun jatu anua paxaibu Eliseon jawen jenekin jatu tenandiaxanikiki.

¹⁸Jabiaskabiaken enabu Israelin enabudan, Ahab xanen ibuaitianan, jabun yushibu Baal dami kenwain ja bebun danti ika dakaxun jawen tae jutsu jutsu akama ikubainimabu 7,000 yudabu en jatu jenexanaii, jawa jatu tenan keyuamadan”, aka

Eliseo kenakin jau jabe dayanun Elíasin katunikiaki, na janchadan

¹⁹Jehován jancha ninkabidani janua Elías kai januxun Eliseon jawen bai anu jawen miban banakatsis ikin ketaxamebainbaina 12 ina awa dabe ji tekishkundabea jabiaskas chichibaina jawen tsumabu mai xexati awa xadamabainkin jatu yunubainkin Eliseon jatundi jawen jenekin mai mishpu wakin ana pewabainaya Elíasin bechibidani jaki nukunun ika kakin dainbainkin Eliseoki jawen yabukuti jaki puenkin peyabubaini kaya ²⁰jawaida Eliseon jawen ina awa jenebaini kushikaini Elías chibain kakin yuikin:

—En ibubu jatu yuikin nukun beya chibankin jatu tantsu ayutanun ea manayuwe. Jatu jaska watani juxun en mia chibankubainxanaii— aka Elíasin yuikin:

—Peki. Jaska min jatu wakatsis ikai jatu aditanwen. Jakia jaska en mia katubidanxu jakimama shinaindatanwen— aka

²¹Elías jenebaini Eliseo kaxun ina awa bene dabe katuxun tesendabetan jawen bichi dashpexun jawen nami inun jawen xau mexte mexte atan awa ji tekishkunmisbu betsa kadu waxun jawen nami bawaxun jatu xunubainkin unanti wamakin jawenabu pima keyutan dayakin tapinun ika Eliseon Elías chibanbainikiaki, jawen dayaduidan.

Nabotin uva bai Ahabin mebinkin bianikiaki, na janchadan

21 ¹Jawatianda kauan chipu Jezreel anu juni betsa jawen kena Nabot jiwea anu jabianudi ja xanen ibujaida Ahab badiantian juindukuin janu kamis jawen jiwe pepa dapi Nabot uva bai jayaken ²xaba betsatian Ahabin Nabot jabe janchakin yukakin:

—Janu badiantian jua janu juindukuin en jiwemis dapi min uva baidan, ea inanwen, nun bianananunan, en uva bai betsa pepajaida en mia inainan. En bai betsa min bikatsi ikamadan, jati jawen kadu depiati peiwen en mia pakatidu ea yuiwe. Jaska en mia yukai ea shinanwen— aka

³jakia kemakin Nabotin Ahab yuikin:

—En ibubun bai ea jenexunbainibu Dios ea yaushixunaya en mia yunutidumaki— aka

⁴Nabotin jancha wakín yuikin: “En ibubun jatun bai ea jenexunbaini en mia inantidumaki”, akin kemawen taea sinatai punu nuka jawen jiwe jawendua Samaria anu Ahab chintunkaini jikitan daka jawen keneki beti ika jawa janchama juinti nishmajaida dakaxun pikatsi ikamaken ⁵ja dapi jawen ain Jezabel kaxun yukakin:

—Min pikatsi ikamadan, ¿jaskakidana min punu nuka juinti nishmajaidamen?— aka

⁶kemakin Ahabin yuikin:

—Jezreel anu juni betsa jiwea Nabotbe en janchakidanxuki. Jawen uva bai nukun jiwe betsa dapike peiwen taexun jau ea yununun, iwanan, en ea axuki. Ja inun, pei bikatsis ikama nukun uva bai pepajaida betsa en inantidu jancha pepawen en yuixuki. Jakia Nabotin ea yunukatsi ikamawen taea sinatai en punu nukajaidakidana ikaii— aka

⁷januxun kemakin jawen ain Jezabelin yuikin:

—Jakia mianan, Israelin enabu jatu xanen ibujaidaxunkin min jatu yunuaii. Nabotin uva bai en mia ibuwamaxanaiwen taea benitan pi ibubis daediwe, ana jawen nuamadan— atan

⁸jawen ain Jezabelin jawen bene Ahab kenawen taexun kene ichapa kenexuntan katunpakekin ja mae anu jiweabu unanepabu inun xanen ibu bexmasbu jatu bumakin yawa xeni binwen dekutan chabaiwen tuis tuis akin bepupaketan jawen meichikiti tuduwen tsaminpaketan jau buxuntanunbun jatu yunua ⁹ja kenewen jatu yuikin: “Na juniwen taea samakekin yudabu bebun Nabot tsaunxun ¹⁰unanti wakanwen. Nabot bebun juni dabetun matu chanichakaxuntidu tsaunxankanwen. Januxun yudabu padankin jabun yuikin: ‘Dios inun nukun xanen ibujaida yuain jatukidi Nabot janchachakashinaki’, akin jau jabun matu yuinunbunan. Jaska jakidi chani yuiaibu tapintan nukun mae anua Nabot kainmabain maxax tunkewen tsaka tsaka akin tenanxankanwen”, jatu wa

¹¹Nabotin mae anu junibu jabube jiweabu anibu unanepabu inun xanen ibubube kene jatu anu bumashina uintan datei jaska Jezabelin jatu yunua june yubakashinxun ¹²samakeakidi jatu banabimabu ma bea ichabun Nabot jatu bebun tsaunxun ¹³januxun juni chakabu dabe ja padan janchawen Nabotkidi jatu yuiaibu jikia tsaunxun yudabu dasibi bebunxun chanichakakin jatu yuikin:

—Nukun mekenika Dios inun nukun xanen ibujaida yuankin jatukidi Nabotin chakabujaida yuii nun ninkashinaki— akabu jatun jancha chanibiaken ikunwankin Nabot achibainkin taxnimabain benanta iyuxun maxax tunkuwen tsaka tsaka akin tenantan ¹⁴Jezabel anu jancha bumakin yuikin:

—Nabot mishki tunkuwen tsaka tsaka akabu ma debuaki— akin Jezabel yuiabu

¹⁵ninkatan benimakin Jezabelin Ahab yuikin:

—Jezreel anu jiwekunkainshina Nabotin jawen uva bai mia ibuwamakatsi ikama ishian ana jiweama ma mawashinakiaki. Uin kaxun jawen uva bai ibuwaditanwen— aka

¹⁶Nabot ma mawa ninkatan Ahab kaxun Nabotin uva bai ibuwaya ¹⁷⁻¹⁸janua Tisbé anua Elías Jehován yuikin: “Samaria anu jiwea Israelin enabu xanen ibujaida Ahab anu jawaida kain uinditanwen, Jezreel anudan. Ikis Nabotin uva bai anu min jaki nukutiduki, ja bai ibuwanun ika ma kakidan. ¹⁹Jaki nukutan ea yuixuntanwen: ‘Jhován jancha ninkawe. Nabot tenanxun jawen uva bai min mebianwen taexun jabanudi Nabotin jimi kamanen taxu taxu akin keyushinabuki. Jabanuxundi min jimidi kamanen taxu taxu akin keyudixankanikiki’ ”, akin jaska Jehován yuia ninkatan Ahab anu kaxun jabias jancha Elíasin xabakabi yuia,

²⁰kemakin Ahabin yuikin:

—Nun sinatai danananandabeaidan, ¿jaskakin ea benabaunkin min ea bechixumen?— aka

Elíasin kemakin yuikin:

—Jaa, en miki nukuxuki. Jehován bedubi ja bechipaiama chakabujaida min akubainmiski. ²¹Jaskawen taexun Jehován mia yuikin: “Mia jawen kupikatsi chakabujaida mia anu en yunuxanaii. Minabu dasibi yamawakin en keyuxanaii, minabu junibu dayadubu inun dayadubuma yamawadiakinan. ²²En jancha jatu dananmakin Israelin enabu min jatu chakabuwamakubainmiswen taexun min ea sinatamajaidaii. Nabatin bake Jeroboamnen enabu ichakawaya en jatu yama wani keska wakin inun Ahíasin bake Baasán enabu ichakawaya en jatu yama wani keska wakin minabudi en yamawadiaxanaii”, akin Jehován mia yuikiki.

²³Ja dikabi min ain Jezabelkidi Jehován mia yuikin: “Jawen jemaintin mishki kenebaunibu dapi Jezreel uke medanxun Jezabel mawa jawen yuda kamanen pikin keyukin yama waxankanikiki. ²⁴Minabu mae anua mawabu kamanen jatu pikin keyuxankanikiki. Minabu bai nekia mawabu xeten jatu pikin keyudixankanikiki”, akin Jehován jakidi mia yuidiaikiki— akin Elíasin Ahab yuiniki.

²⁵Ahab jaskanikidi matu yuinun ea ninkakanwen. Ahab xanen ibukin xanen ibu tibi jaska idiabuma jawen ain Jezabelin shinan chibankin Jehová sinatamakin chakabuwakubainikiaki. ²⁶Israelin enabu jau janu jikinunbun Amorreo nawabu Jehován jatu nichinbianiken jawen yushibubu dami Ahabin jawen ainbetan duawakin kenwankubainaya june jawenabun jaskakidi jatu bechipaiama inibukiaki.

²⁷Elíasin jancha dasibi Ahabin ninkatan jawen xanen ibukin sawemis tadi manyunepa ushnikin putatan jawen nui bika tenei unanmati tadi bexa sawea, samakei, jabias tadi tubeya uxakunkaini ana kanekatsi ikama juinti nishmajaidakunkainaya ²⁸⁻²⁹januxun Elías Jehován yuikin:

—Uinwen. Ekidi shinain Ahab ana pe peama jiwekunkainaidan, ¿min ma uinxumen? Ekidi shinain datei ana kaneamawen taea Ahab jiweyuken jawenabu kupinkin en jatu tenandiana ixanaii. Jakia jawen xantukun jawen juni bake Israelin enabu xanen ibuaya en jatu kupikin yamawaxanaii— aka

**Ahab mawaxanaikidi Diosun jancha yuixunika Micaíasin
banabimanikiaki, na janchadan
(2 Cr 18.1-34)**

22 ¹Siria nawabu inun Israelin enabu detenamemisbu ma 3 año binuaya ana detenameabumaken ²jakia 3 año binuaitian Judán enabu xanen ibujaida Josafat Israelin enabu xanen ibujaida Ahab anu bai kai jikia ³jabe tsauken jabe xanen ibumisbu xanen ibujaida Ahabin jatu yuikin:

—Nukun mai pakea anu mae betsa Ramot Galaad anudan, nukunaki. Siria nawabun nuku mebinbianibu ana nukuna wakin ¿Siria nawa xanen ibujaida anua jawakin nun ana jatu mebianmamen?— jatu watan

⁴⁻⁵januxun Josafat Ahabin beiskin yukakin:

—Galaad anu nukun mae betsa Ramot ana jatu mebin nun jatube detenamei kayadan, nuku medabewai ¿min nukube katidumamen?— aka Josafatin kemakin yuikin:

—Ea inun en detenamenikabu inun en caballowen katsaumbainmisbun mia inun minabu nun matu medabewatiduki. Jakia ja dukun Jehován jaskada shinain nuku yuitidumenkain, yukananwen— aka

⁶jawen Diosun jancha yuixunikabu 400ti Israelin enabu xanen ibujaida Ahabin jatu kenakin ichawaxun yukakin:

—¿Galaad anu nukun mae betsa Ramot jatu mebin katanpa? ¿En daki kayamati?— jatu wa jabun kemakin yuikin:

—Xanen ibu Diosun mia inainwen taea detenamekin Siria nawabu putakin jatu nichinditanwen— akeakeabu

⁷jakia Josafatin Ahab ana yukakin:

—¿Jhován jancha yuixunika betsa nenu ana jayamamen, jadi nun yukadiatidukidan?— aka

⁸Israelin enabu xanen ibujaida Ahabin kemakin yuikin:

—Betsa jayaki. Imlán bake Micaíasin Jehován jancha nuku yuitiduki. Jakia jancha pepa eki chaniama jancha chakabus besti ea yuikubainmiswen taea en ja bechipaismaki— aka

Josafatin nemakin yuikin:

—Jadi janchakin yuizamawe— aka

⁹januxun jawaida xanen ibujaida Ahabin jawen yununika kushipa bexmas betsa kena ma jua yununikin:

—Imlán juni bake Micaías jau jawaidakidanun nuku yuixuntanwen—
aka kaya

¹⁰janua jabu ikidan, Samaria jikiti xui anu jikikain jemaintin xaba tudu anu ja xanen ibu dabe jaya detenamei kati tadi sawea xanen ibujaidatun tsauti dabe anu tsauabun janua jatu bebun Ahabin Diosun jancha yuixunikabu dasibibu nishi paewen paean keskatan jatu jancha pepawen yuikubainaibun ¹¹jabianuadi mane kushipa ja due wati dami wakin ina awa bene maxun chaipa keska waimaxun Quenaanán juni bake Sedequíasin tsumaxun jancha kushipajaidawen Ahab yuikin:

—Eska Jehován mia ma yuikiki. Na maxun dabewen ina awa bene sinatai keskakin jatu tu akin chachi chachi akin Siria nawabu xutu xutu akin jatu tenankin keyuditanwen— akaya

¹²dasibi Diosun jancha yuixunikabun jabiaskasdi janchawen yuidiakin xanen ibujaida Ahab yuikin:

—Ja mae Jehován mia yunuikiki. Jaskaken Galaad anu nukun mae betsa Ramot anu kaxun Siria nawabube detenamekin jatu maemaditanwen— akeakeaibun

¹³jancha bunikatun kenatanun ika kaxun Micaías yuikin:

—Diosun jancha yuixunikabun kemakin jancha pepas nukun xanen ibujaida dasibibun ma yuiabuki. Jaskaken en mia ea akaii, dasibibube janchakin en xanen ibujaida jabun yuixu keska wakin miandi jancha pepawen bebunkidi xabakabi yuiyuwe— aka

¹⁴jawen jancha ninkabiakin Micaíasin kemakin yuikin:

—Jehová jiweawen taexun jaska Jehován jaska shinain ea yuia besti en jatu yui kaii— abaini

¹⁵jabe ka xanen ibujaida bebun ni tushiaya Ahabin yukakin:

—Micaásiin, Galaad anu nukun mae betsa Ramot jatu mebinun ika ¿Siria nawabube jatube detenametampa? ¿En daki kayamati?— aka jawen jancha ninkaxuinsmawen taexun Micaíasin yuikin:

—Jehován mia ibuwamaxanaiwen taea detenamekin Siria nawabu putamakin jatu nichinditanwen— aka

¹⁶jakia xanen ibujaida Ahabin kemakin yuikin:

—En miki chanibia min ea yui pewaismaki. Jehován jancha jawada mia yui ai besti ea yuiwe, natian Jehován kena kushipawen chanima jancha besti ea yuikinan, en ninkakatsis ikaidan— aka

¹⁷januxun Micaíasin yuikin:

“Mati matipa anu Israelin enabu dasibi paxkai sa iki keyuabu, chaxuwan ichapa mekenikauma keskabu en uianyan Jehován ea yuikin:

‘Jabudan, ibu jayabumaki.

Jatun jiwe anu chintunbaini unanuma bestibu jau bununbunwen’, akin ea yuixuki”, aka

¹⁸xanen ibujaida Ahabin Josafat yuikin:

—¡Uinwen! Jaskakididan, ¿en mia yuiama ixumen? Jancha pepa ea yuismadan, jancha chakabu besti ja junin ea yuimiski— aka

¹⁹⁻²²xanen ibujaida Ahabki dateama Micaíasin yuikin:

—Jaska min ekidi janchaiwen taexun Jehová jancha ninkawe.

Jawen xanen ibujaida tsauti anu Jehová tsaua dasibi jawen mekenika nai tsumabu ja naman icha jatidi jawen tae yusiudi mapuabu inun jatidi jawen tae yusmaudi mapuabu Jehová jatu yuikin: “Galaad anu Ramot mebinun ika Siria nawabube detenamei jau tin ika mawaxanun ¿tsua man kai, Ahab padainan?” jatu wa betsan jatun shinan tibi besti yuiaibun betsandi jatun shinan betsakidi yuidiaibun jakia atimas yushin betsa Jehová bebun nixun yuikin: “Ea en katiduki”, aka Jehová kemakin: “¿Min jaskatan aki kai?” aka yushinen kemakin: “Jau chanichakanunbun kaxun xanen ibujaida Ahabin min jancha yuixunikabu tibiki jikitan en jatu chanichakamai kaii”, ikai ninkatan Jehová yuikin: “Padankin Ahab min binuxanii. Jaska min yuiái keska axuntanwen”, aka juai en uinxuki. ²³Min Diosun jancha yuixunika tibitun kexa anua yushin chanichakamis Jehová ma jatuki mistuaki. Ja inun, min mawai kai Jehová yunudiaxuki. Ikis min uin kaii— aka

²⁴jatukidi janchai ninkatan sinatai Quenaanán juni bake Sedequías Micaíaski kematan tanpais akin yukakin:

—¿Mibe janchai Jehová yushin eanua jadakidi kainkainken ixumen?— aka

²⁵Micaíasin Sedequías kemakin yuikin:

—Jaska en matukidi yuixu detenamei mawaibun jani jaskatima jiwe medan dintu june anu min paxai idu akeakekin jadakidi Jehová yushin mia anua kainkainxu min unanxanii— akaya

²⁶jaki sinatakin xanen ibujaida Ahabin jatu yunukin:

—Micaías achitan nukun mae xanen ibu Amón inun en juni bake Joás anu iyuxun ²⁷jatu yuikin: “Nukun xanen ibujaidatun matu yunuikiki. Bichiti jiwe medan bichitan paxai unanuma en chintundiamami misi inun unpax eskadabes pimayukubainxankanwen”, akin jatu ea yuixuntankanwen— ikai ninkatan

²⁸Micaíasin Ahab ana yuikin:

—Jaska min unanuma chintunxanaikidi Jehová jaska ea jancha wakin yuiama ixuki— ikaya dasibi yudabu jemaintin ichai keyuabu ninkaibun

²⁹jaska jatu yuibiaya jatun detenamenikabu pewakin keyutan Israelin enabu xanen ibujaida Ahab inun Judán enabu xanen ibujaida Josafat Galaad anu mae betsa Ramot mebinun ika jatube bukin ³⁰Ahabin Josafat yuikin:

—Jau ea unanyamanunbun en xanen ibujaida tadi saweama juni betsa keskakin tadi betsa sawetan en jatube detenamei kaii. Jakia mianan, en

tadi sawea kakunkainwen, jatu unantimaskawabainkinan— atan jawen xanen ibujaidatun tadi pekatan tsua jawa unanmamatan detenamenun ika jawen detenamenikabube Ahab kai ³¹ jakia jawen caballon tadanbainti detenamenikabu jawen bumisbu ³² xanen ibu bexmasbu Siria nawa xanen ibujaidatun jatu yunukin:

—Detenamei taebaunkinan, Israelin enabu xanen ibujaida Ahab ja dukun bechitan betsabukidi shinanma ja besti tenanun, iwanan, chibanxankanwen. Jatu ashianwen taexun ³² Josafat jawen xanen ibujaidatun tadi sawea caballon tadanbaintiki nia uintan Siria nawa xanen ibu bexmasbun shinankin yuikin: “Jadan, Israelin enabu xanen ibujaidaki. Tsakanun bukanwen”, iake iakekin binubaunkin chiban taewaibun jatu uintan paxai kushikaini datekin jui kushipawen jawen detenamenikabu Josafatin jatu kenakin: “Ea medabewai bekanwen”, jatu akeakeaya ³³ jaskai nia Judán enabun xanen ibujaida uintan ja Israelin enabun xanen ibujaidamaken ja detekatsi ikama unantan chibankin jeneabu ³⁴ jakia jabiatiani Siria nawa detenamenika betsan pia manankidis bishkua jadakidia ja pia ti ikai unanma Ahabin mane tadi bexpanu pia ti ikin punchaxa isin tenejaidakin caballo jatun iyua yunukin:

“Ja detenameaibu anua ana jadi ea iyua ma ea chintun wanwen, ma ea piawen tsakabu en isin tenejaidaidan”— aka

³⁵ día jidabi detenamejaidaidibun jawenabu datei jau paxayamanunbun Siria nawabu bebun jawenabu detenameaibun jakia jatun pechiudi nia jawen caballon tadanbainti anu jawen jimi shudu shudu iki Ahab nibiabai babui punu nukatan jawen tadanbainti namaki jimi mataya badi jikiaya mawai di ikaya ³⁶⁻³⁷ ma badi kaya jawen detenamenikabu jatumebi yuinamekin: “Nukun xanen ibujaida ma mawaxuki. Ana tsuan nuku yunutimaki. Inun budinankanwen”, iake iaketan Siria nawabu jenebaini buaibun,

jawen maewan Samaria anu xanen ibujaida Ahabin yuda bui jaya kaxakubainkin mai wanibukiaki. ³⁸ Januxun Samaria dapi ian pishta tsua anu janu ainbu jininipabu nashimisbu anu Ahabin caballon tadanbainti janu buxun jaska Jehován bebunkidi yuishina keska wakin kamanen jawen jimi taxu taxu akin keyuaibun jawen tadanbainti jimi chukakin pewanibukiaki.

³⁹ Israelin enabu xanen ibujaidakidi miyui una medan jaska Ahabin akin yuinaka betsa ewapajaida elefante xeta juxupa chaipa ichapawen jawen jiwe ewapa jatu jawendua wamani inun mae ewapabu jatu amakubauni inun dasibi akaikidi jakidi kenenibu jayaki. ⁴⁰ Ahab mawashinken jawen xantukun jawen juni bake Ocozías Israelin enabu xanen ibujaidai taenikiaki.

Judán enabu xanen ibujaida Josafat taekainikiaki, na janchadan
(2 Cr 20.31-37)

⁴¹⁻⁴² 18 año bebunkidi Ahab Israel anu jatu xanen ibuxunaitian janua 4 año kainaitian Jerusalén anuadi Asán juni bake Josafat 35 badiya

Judán enabu jatu xanen ibujaidaxuni ja xanen ibuidan, 25 año jatu yunukubainikiaki. Jawen ewan kenadan, Azubá inikiaki, Silhín bakedan.

⁴³Jaska jawen epa Asá pe jiwekunkaini keska Josafat pe jiwekin jaska Jehován bechipaiai keska akubaini jakia mati keyatapa betsa betsapa anuxun Jehová shinanbuma yushibu betsa kenwankin inabu nami kuaxunmisbu inun yushibu dami bebunxun kenwankin xeni ininipa kuaxundiamisbu jau yamawanunbun jawen dayadubu Josafatin jatu yunuama akubainikiaki.

⁴⁴Israelin enabu xanen ibu bu inun jawen epa Asábe detenamebiapaunibun jatube unanuma jiwekatsi ikin Israelin enabu xanen ibujaida Ahabbe Josafat yubakai daenamenibukiaki. ⁴⁵Judán enabu xanen ibujaidakidi miyui una medan jaska Josafatin akubaini inun, detenamekunkaini dasibi jakidi kenenibu jayaki. ⁴⁶Jakia jawen epa Asá xanen ibuitian ja ainbu jininipabu jatu chutakin kenwanti keska wakin jatu pei inankubainmisbu jatidi jawen epan nichin keyuama ini jabias jaya Josafatin jatu keyu nichinkin keyunun ixun jawen dayadubu Josafatin jatu yunua Judán enabun mai pakea anua jatu nichinmakin keyunikiaki. ⁴⁷Ja jatu jaska waitian Edom nawabu Judán enabun jatu maemaimawen taea Edom nawabu jawenabu xanen ibujaida jayama xanen ibu bexmas besti jayanibukiaki.

⁴⁸Ianenwan kexa anuxun jaska Tarsis anuxun xaxu wakin jaxpa chaipa wamisbu keskadi wakin Josafatin jatu amaima jawen Ofir anua oro mane binun ika buaibun niwewan kushipa bekin maewan betsa Esión-guéber anuxun ja xaxu ewapa ianenwanen dasibi tuax tuax akin keyunikiaki. ⁴⁹Chipu Israelin enabu xanen ibujaida Ahabin juni bake Ocozíasin Ofir anu Josafatin enabube xaxu ewapawen buaibun Ocozíasin jawen xaxu ewapa bunikabun jatu chibanpanan Josafatin jatu naneama inikiaki.

⁵⁰Chipu Josafat mawa Jerusalén anu bekex betsaudi jawen kena Davidin Mae anu jawen xenipabu maiwanibu anu Josafat mawa maiwadianibukiaki.

Janua jawen ibuan xantukun Josafatin juni bake Joram Judán enabu xanen ibujaidai taenikiaki.

Ocozías Israelin enabu xanen ibujaida inikiaki, na janchadan

⁵¹Judán mai pakea anua Josafat xanen ibujaidakaini 17 año binuaya jabiatiandi Ahab mawaken jawen juni bake Ocozías jawen epan xantukun Samaria anu 2 año besti jatun xanen ibujaida inikiaki. ⁵²Israelin enabu Dioskidi chakabu jatu shinanmakin paxkakin Nabatin juni bake Jeroboam inun jawen epa Ahab inun jawen ewa Jezabelin chakabuwakubainibu keska jabiaskadi chakabu jatu chibankin jawada shadabu Jehován bechipaiaama Ocozíasin diakubainikiaki. ⁵³Israelin enabun mekenika Dios Jehová jawen epan sinatamapauni keska wakin jawen bakendi jatu chibankin yushibu Baal dami betsa betsapa duawakin kenwandiakubainikiaki.